

小  
匏  
庵  
詩  
話

小宛菴詩話卷七

嘉興吳仰賢牧騶輯

三代時封建法行士各仕於其國其爲貧而仕者獲菽水之助而無脂秣之煩効器使之能而免需次之累故曰祿養非以祈速富也然室人交謫之歎猶不免焉況今昔勢殊謀生途窄百計博一官以爲孤注者乎宜其向隅者多也蒲城王受之司馬益謙詩云本是因貧仕何曾富范丹夢魂留故國菽水誤微官入世酬恩未今生語孝難當空鳥鳥過不敢放金丸忠厚纏綿無牢騷不平之氣北門詩人有媿色矣司馬爲文恪公從弟嘉慶戊辰舉人官福建汀州同知居官多惠政學有根柢著太華山人詩存如俗成今也儉民是古之愚預愁見面難爲別已到忘形尙有詩皆可誦也

粵東詩社最盛與會者往往千餘人予所見僅西園吟社刊本  
一集爲題二曰唐荔園曰肇荔亭詩各體俱備主評選者爲四  
明童葛君先生槐按園在羊城西荔支灣中灣之由來皆目爲  
南漢昌華宮故址南海邱氏于此構竹亭瓦屋題曰虬珠圃揚  
州阮賜卿公子福精于考古謂荔灣不始于南漢引唐舒州人  
曹松南海陪鄭司空游荔園詩爲據因更邱氏之圃曰唐荔園  
而顏其亭曰肇荔集中唐荔園詩推張繩前作爲絕唱曰千年  
勝跡賴尋搜不負珠江載酒游從此荔園添故事曹舒州後阮  
揚州此不過切合當日情事耳肇荔亭詩則推徐仁廣作曰萬  
樹炙江天孤亭一角偏偶移青翰舫來揖絳襦仙佳節當重五  
清尊醉十千不須勤秉燭自有夜珠懸又徐良琛作曰半醉憑  
欄拍掌呼欲揮如意擊珊瑚酣來喚起鵝潭月映徹仙人白玉

尚

錢塘女史袁紫卿綬爲金陵吳伯鈞室而簡齋先生孫女蘭邨先生長女也著有瑤華閣詩集胚胎家學彤管揚芬足繼三妹合稿之盛咏瓶云汲處淺深衡水易插來宜稱選花難量寬似爾能容物膽小於君亦耐寒送倚筠表妹赴山左云此去定知鴻案樂再來莫負鹿門期消夏云畫中山好身難入書內人多事易忘皆有性靈又春不老者卽吾禾所謂冬菜也調寄菩薩蠻云一畦種向荒園裡一繩曬向晴窗底細灑水晶鹽曾勞玉指尖佳名聽便好眞箇春難老甘脆醒微醒樽前更憶卿脫口如生不媿才媛吐屬

賈坻高寄泉繼珩嘉慶戊寅舉人廣東博茂場鹽大使少工屬文詩亦有奇氣五言如亂山圍客夢夜雨溼愁心地僻僧無伴

梁穿佛見天七言如夢想梅花到南海飽嘗荔子學東坡慰李子黼落解云能詩久推白無敵善射休嗟廣不侯俱新穎

番禺馮子良太守詢嘉慶庚辰進士其詩沈思拔俗卓然名家有行路難二十首豪俊神似明遠以集隘不及登今錄其近體如得廖豸峯書知改置嶺南賦詩寄慰云蠻烟瘴雨足驚魂往事淒涼且莫論誰分道途憐謝奉卻休風浪怨章惇人從黑獄傳詩卷天與青山記淚痕君是異鄉吾故里梅花相憶各傾尊此詩悱惻纏綿足與唐賢爭勝泊清遠峽云又留塵影到江湖雨笠風衣事事粗試茗泉如禪味澹擁書燈其客心孤親年七十一官待驛路三千八口俱只有琴書無儋石可能高卧學潛夫其餘佳聯如身賤辭家易途長得店難蕭條過壯歲辛苦作閒人悔不十年先種樹愁非九月亦催租居猶近市終非隱僧

亦持家不易空仕路艱難康伯遁俸錢分散彥謙貧短衣去國  
原輕別大被離鄉倍覺溫世情似酒醒無味科第如詩得偶然  
冰開隙道容泉去雪匿陰崖避日行三千世界原無着八百孤  
寒大有人皆人人意中所有人人筆底所無

吳西穀府丞清鵬號笏庵嘉慶丁丑探花爲穀人先生令嗣詩  
有家法屯田行云征塵蔽原日馬鳴車郎當送者至燕郊行人  
俱束裝問之隸旗籍平生惟食糧今將赴營田盡室載邊疆百  
年重安土遷徙亦非常朝辭六親出暮宿孤驛旁四野無人烟  
但聞狐與狼回頭望都邑行色轉悽惶萬里苟不到焉知爲樂  
鄉吾觀朝廷意爲汝謀久長又念道路苦官爲送啟行行者  
各有給助汝充囊囊矧聞將軍賢撫養甚周詳雙城雖云遠土  
沃宜稻梁已令具稼器卽與營田房井地各著界廬舍互相望

身既免役隸官又無輸將犁耨雖習苦四體庶自強歲晚足狐  
兔射獵多閒場一年成邨聚三年富城隍去去保家室慎勿懷  
疑傷按吾朝定鼎燕京安插八旗月給以糧令毋奪漢民利  
此當日撫定九有至公至大之用心也然二百年來生齒日繁  
旗民日形拮据屯田之議屢次試行尙未大收成效此篇言爲  
旗民謀久長始憫其勞繼釋其疑立言得體與書生之見不同  
昔裴將軍持弓挾矢一日而斃彪卅一以爲虎也及遇眞虎而  
人馬辟易弓矢皆墜甚矣服猛之難也若乾隆時有分防靖州  
袁將軍者連殺七虎身與俱斃事可傳矣時山中七虎並出傷  
人甚夥將軍奉檄捕虎盡將軍亦死官民欲爲廟祀不果久  
而湮沒不能舉其名江都布衣張老璉鏐作袁將軍殺虎歌曰  
靖州城中晝閉門靖州城外虎食人一虎之暴尙難弭七虎之

暴可知矣。傷人虎漫逞其羣。殺虎自有哀將軍。將軍挺身截虎路。虎識將軍虎先怖。將軍見虎怒鬚髮。霹靂一聲火鎗發。四虎連殲。三虎逃。地上羊酒如山。高州人相賀。將軍行虎毒。旋入將軍營。將軍抽身歸所轄。赤手思將虎牙拔。將軍忘身虎忘死。人虎山中日相伺。腥風捲地山動搖。長林豐草秋蕭蕭。將軍潛知虎躡後。揮轉空槍與虎鬪。山深地僻火具遺。鎗不得發力可施。揮鎗擊虎虎如狗。一虎着鎗破其首。虎勢漸絀。人膽驍。兩虎心怯難支。吾一虎誘敵。一虎走潛身。竟出將軍後。將軍左臂遭虎傷。虎脇旋折。將軍鎗此時將軍手中無寸鐵。一虎憑陵虎愈烈。逆豎剛毛雙背裂。當頭一撲如山蹶。將軍力盡技已窮。以首觸虎。虎洞胸。白日慘澹來。悲風人虎同斃。荒山中。州人深感將軍功。四郊哭泣聲摩空。君不見將軍之勇虎難敵。將軍爲民身不



惜至今人過靖州城。故老猶傳殺虎蹟。盧綸觀咸甯王部曲擒  
虎歌。沈文恪謂如太史公敘鉅鹿之戰。余於此詩亦云爾。  
山陰王佩荦明經克甯有射虎行云。伏龍山前。俚夜語伏龍山。  
下婦哭。苦行人望見。伏龍山風吹草搖。草亦虎。山中居民慣射  
生。弓刀劍戟成一營。北平太守爾何事。朝下官符夜選兵。官軍  
身手一何銳。自言搏虎立斃。往來市口索酒嘗。白晝向人作  
虎勢。磨刀霍霍夜欲闌。平明結隊其入山。長林雲黯日無色。猛  
虎突出豐草間。挽強射虎。虎先逸。一箭正中草頭石。落花滿地  
風過耳。墜日空看虎行跡。此時山南大合圍。虎行乃有虎機。隨  
居民一隊齊攖虎。斑毛載得盈車歸。明日官符下鄉里。官軍自  
言虎射死。上官奪虎歸官軍。里長縛民入城市。回頭笑煞山中  
人。此虎豈是封使君。不然虎死何足惜。胡乃爲虎讐。居民此詩

言山民自能捕虎太守選兵爲多事兵至索酒先作虎勢是以  
虎捕虎也夜而磨刀狀其張皇朝而結隊狀其恇怯至射虎不  
中思喜漁翁之利與山民爭死虎而陷之以罪則虎患愈熾矣  
彼軍中懦將驕兵擾人之功何以異是

讀湯雨生將軍南山有虎行一篇知將軍非真不好武者詩云  
南山有叟攜僮牧叟騎老牛童帶犢忽聞霹靂人牛奔一虎當  
頭來食肉叟離牛背入虎口手搯虎口重吐落兩牛全力斷雙  
角虎欲格牛叟置卻童奮牛鞭助牛氣叟擊虎石中虎腳叟童  
力盡匿牛後牛益突前虎驚攔翻身一嘯入深林難得牛忠離  
虎盧今朝有樵來告官南山有虎民不安不乞官司好弓手怕  
向山邨索牛酒我雖不及裴將軍何人竟作封侯君大戟長鉞  
提上馬肯被南山牛笑人一收矍鑠據鞍鬚眉畢現將軍名貽

汾武進人本世家子天才卓犖藝事精能以難蔭雲騎尉遂奮  
迹戎行景宗能詩思訓善畫將軍兼而有之又諳叶律有周郎  
顧曲之雅嘗官吾浙樂清副將某大吏嫉其能挫辱之亟投劾  
歸流寓金陵益從事詩文著作日富咸豐癸丑春殉粵寇之難  
有琴隱園詩詞集

近日達官中能詩者余以吳仲雲制軍爲最花宜館一集不矜  
才不使氣溫厚和平語語如其人意中所欲出令讀者自然首  
肯此境豈易言哉何子貞太史有題花宜館集後詩佩服極深  
益喜余所見之不謬詩曰觸物論議發詩心熱如火百紙盡一  
揮其疾又如箭先生歎謂曰子才何不可顧能驚四筵未信適  
獨坐微論屢已快一編欣示我根巨本閱深樵鑿入細磨奇藻  
削繁蕪洪波涵澹沱忠孝闢大節風土陳細瑣精心一縷繫旁

魄萬象。褻許我挾卷行歸裝。壓飛舸。沈吟日百徧寒鐙。墜花朵  
所獲良已多。策勵自信頗。始悟坡老言。守駿莫如跛。公歷任封  
疆。每接見屬僚。喜怒不形辭。無枝葉雖甚。有所憎愛於其間。了  
不可窺。蓮幕中有竊議其落寞者。公語之曰。督撫一顰一笑。眾  
所揣摩。可不慎歟。斯言能識體要。然則公詩之含蓄深沈。其性  
情然也。

咸豐丁巳滇南漢回。搆燬仲雲制軍奉命督師時。粵寇方張。  
蔓據數省。滇處天末。調兵微餉。勢出萬難。公至主撫議。非本意  
也。旋引疾去。作留別詩四首。有云。禍猶未已。千瘡痍事到難言。  
一涕洟待商去。仕乾坤窄。注意安危。將相誰功名。此地爲終始。  
氣誼諸公託死生。時制軍年逾杖國。詩格益臻蒼老矣。  
宋仁宗在位四十二年。物阜民康。爲天水三百年中極盛之時。

劉信叔有過昭陵詩云桑麻不擾歲豐登邊將無功更不能四  
十二年那忍說西風吹淚過昭陵遭逢多故追想承平有慨乎  
其言之者至我朝康熙乾隆紀元各六十年民俗之繁盛邁  
越前代憶仲雲制軍有題國初湯文正王文恪諸公宮僚雅  
集圖云此是康熙全盛日莫將詩酒等閒看措辭何等蘊藉然  
言外亦殊寓無限低回

馬嵬坡楊貴妃祠內石刻詩篇甚多近人中惟林文忠七絕八  
章甚佳和者數人不免伧俗且因末章改韻難叶易叶妍字亦  
乖和韻之例今錄末首云籍甚才名長恨篇先皇慙德老臣宣  
詩人解識君親義老杜而還只鄭畋以畋詩終是聖明天子事  
景陽宮井又何人爲立言得體也畋韻洵難押余效顰云唱罷  
虞兮畢命篇中興從此啟周宣小憐不顧平陽陷只賺官家原

上畋按北齊書周師取平陽帝獵於三堆晉州告急帝將還淑妃請更殺一圍從之

嘉善黃霽青先生安濤嘉慶己巳傳臚由編修出守廣東潮州府歸田後營主講駕湖書院著有詩娛室集學贍才華體格大備爲諸生時卽與吳澹川先生譚藝甚契故聞其逝也賦詩感懷云南野堂中一面緣剛逢垂老倦游年襄陽耆舊能無傳杜曲桑麻未有田正好交情論晚歲豈知冥路作詩仙難忘開徑相期處手揀旗槍煮石泉

梅里一區經竹垞翁提唱宗風後進之士聞風興起在乾嘉時如楊子讓明經謙文璞茂才蟠父子濟美著述裒然李奉桴孝廉超孫薌泚明經富孫慶伯明經遇孫爲秋錦先生五世孫羣彥翩翩一時有小三李之目復得丁小鶴明經子復張堯民孝

廉昌衢羽翼接武踵厲文壇亦文人鼎盛時也稍後馮柳東太史登府以承明著作之才屈就琴堂宰將樂縣未及兩月卽告歸旋改授甯波府學教授太史天姿穎異枕肱功深所纂述甚富而於詩詞尤能繼踵前修在甬上刻拜竹詩龕集惜遭海氛梨棗盡燬今僅從續梅里詩輯中窺其大略而已有玉帶生歌長篇雖不及竹垞翁原作之奇肆然才藻富麗波瀾老成實足與樊榭山房抗席篇長不及錄近體如勺園秋興云幽人偃蹇桂之樹野客棲遲桑者閑一笑草堂初斷手百年尊酒且開顏杜陵突兀東西屋公謹玲瓏大小山我算菟裘粗計定幾時家計莫相關勺園者太史故居嘗繪園中八詠圖曰奉輿軒曰古靈源曰拜竹詩堪曰一朵山曰柳界曰小橋李亭曰酌史巖曰一把香茅屋閉戶著書足想太史自得之趣矣

曝書亭在梅里荷花池之陽築於康熙三十五年至嘉慶元年  
阮太傅文達公督學兩浙屬郡守伊公湯安因舊址重建次年  
太傅親至亭落成賦詩纂竹垞小志同人題詠甚眾太傅復刻  
詩於石柱有我是前身朱竹垞再來重建曝書亭句朱氏後人  
惡其語旋剷去之太傅固通儒博學然遽自命爲竹垞後身恐  
未必能厭眾論也踰三十年秀邑侯呂筠莊延慶復倡捐重修  
屬馮太史諸君董其役太史有詩四章云柳圩槐汴伴吟身老  
去拖筇策杖塵八萬卷書傳舊史十三郡社結遺民小樓牆角  
何時補一把香茅不救貧差勝永甯高相里青苔門館屬他人  
一碧幢紅籀記重尋詞客江關感不禁圖畫爭誇天下借亭臺  
多費巨公心賦詩遠問花三徑好事真移石一林商略平泉添  
小志夕陽老屋護苔陰

其二垞南風雨故依然轉眼頽垣又卅年



別著高窗開竹戶新添小閣繞茶烟歸田尚說邱爲宅載酒思  
乘范蠡船難得東萊賢地主一囊肯割買溪錢其郊趙曾起戴  
逵宅摩詰愛圖鄭樸園白髮猶思讀畫客青門喜見作詩孫釣  
坊春水通鴛棹離落金風近蟹村黛色成陰無恙在草堂重與  
慰吟魂其道光庚戌上元朱述之師緒曾宰我邑復有修亭之  
舉并驅舫葺之粵寇之變幸逃劫火然堂軒舊址半已割售於  
人同治丙寅吳和甫學使存義捐俸贖歸重加修築訪求先生  
嫡裔一人已爲酒家傭憐其孤寒置田一區以資薪水噫兒童  
不識字耕稼魏公莊古今有同慨已

竹垞先生小長蘆釣魚師圖爲禹之鼎作先生父子俱有像題  
者十五家皆三體詩曩爲張叔未解元所藏柳東太史續題三  
首最佳著書但送老歸釣尙留坊應有白漚見紅衣坐夕陽

江湖大小朱十門材風貌阮雙得魚呼取其醉吹笛自按新腔

笛漁有月波吹笛圖

蘆葉蘆花傍釣灘白頭自分老江干一漁五相皆

千古不在區區七品官按曝書亭所藏書籍圖畫文玩散佚殆盡最後有鬻及先生授兩孫分書手跡者雖佳話亦惡趣也馬小眉洵見而感賦云烟雲過眼忍重論蠹紙依稀字可捫舊業只餘三徑在當時奚啻一經存能令遺墨歸藏弄幾見良田到子孫直得兼金爭購取百年猶可想清門

堯民勵行績學嘉慶丙子登賢書後一月而卒著有春陰閣集柳東太史稱其詩名雋動人如鮮荔入口玉筍浣紗今讀其移居詩如室有酒香蜂入座庭無人跡鶴看棋宅非近市甯憂俗身不求人卽是仙屋枕水邊苔礎碧門開雨後稻畦青庾信小園難論歎盧仝破屋不成間諸聯派近劍南俱清麗可誦

韓石齋詩集中僅歸九首純是一片至性流出紙上不必規規求合古人自成章法近讀錢警石先生哭堯民孝廉七首樸實真摯洵足嗣音今摘其警語云我少失諸兄如手足枯僵所賴賢友生疾痛相扶將又云文字互商略質樸見古初當面或相詆背面還相諛相諛非阿好相詆非齟齬又云豈知十日前值子來叩關叩關不相見讀子書循環豈知十日後惡耗驚來傳重尋子書讀墨瀋餘斑斑又云與子永訣絕哭子能無詩我詩所能言和淚一灑之我詩不能言默默長自思按堯民歿後其妻因連喪子女亦自縊以殉惟存老母平湖高一謬慟以詩所云獨拋白髮燈前坐地下依然聚一家是也禾中才士之厄未有如孝廉者

吾鄉曹種水明經言純工詩善倚聲好刻苦之學到老不疲凡

十七史及各部叢書名人詩文集莫不手自鉤摘擷其菁英家故貧妻女篝燈夜紡君手一編分光硯北掌錄口哦無虛夕也所手鈔書不下千餘冊後皆散佚予得其百餘冊其刪節有法首尾貫串者惟水經注計一冊君所恆心亦歸余經兵燹亡去矣君詩五言學選體七言古學李杜今體祖唐宗宋時有新裁嘗見其手書五律一帙就正於君之老友蔣花隱浩蔣爲塗乙改削始信老輩攻錯互施功收益友非若末俗之面諛而腹詛也與郭頻伽稱莫逆交屢有倡和其詩已選入靈芬館詩話及吳澹川南野草堂筆記中其後人所刻徵賢堂集余未獲見惟記得詠蘇文忠馬券石刻云千金無人買駿骨一領青衫老白髮窮途役役誰更憐獨步長街踏明月此是君幼時應府試詩與叔未解元作同時傳誦乃起二語竟成詩讖悲夫

同邑徐叔獻先生錫可一字子申號蠶軒又號可叔從叔中丞  
公之外舅也好古績學屢蹟秋闈僅以明經老性好吟咏兼工  
篆刻晚年真行八分益遒古得金石氣道光甲午乙未閒以詩  
受知於郡守瑞端節師魏塘黃霽青太守尤加歎賞引爲忘形  
交倡和最盛著有小青藤館得酒趣齋等集新居雜咏云野曠  
春暉近桑畦夕照斜掩關無吠狗開徑有鳴蛙傍水張融宅編  
茅庾信家故人如問訊門對紫藤花送馬澗于之山右錢恬齋  
方伯幕云輕裘耿長劍旅揖出郊坰此夜疎吟侶載塗明客星  
關心汾水碧到眼霍山青華府當春暇爲探風峪經題博望公  
後支譜云嘉禾肇宅穀長貽六百年來其本支于宋季始遷嘉禾分支二長畏崇公爲子之棗木叢殘祠部牒明成化中祠部別祖而博望公則其次也茶花繁衍魏塘枝博望公寶乘于博望公後未經纂入後家宰初居魏

塘五傳至宏治間鄉飲大賓南州齒德尊羣仰北路豪華習早  
敬始遷鍾隸鎮之山茶花浜  
辭弓冶吾宗多足詠清芬珍重一編持按博望公名碩卽纂至  
元嘉禾志者此詩足備吾邑族望考又蘆花七律收聯云能爲  
世閒窮士庇白頭不礙老江湖儼有杜陵廣廈之想

馬澹于先生汾邑中老明經好吟咏工倚聲吳澹川先生嘗激  
賞之平生脫稿甚富後其家爲梓耨雲軒詩集四卷詞兩卷張  
叔未解元序之謂澹于早時年少氣盛善談古今人事得失如  
陳同甫辛稼軒一流人故其詩多激昂變楚之音中年後客游  
秦晉攬高山大河之勝藉以激發其志氣其所作尤雋傑晚歲  
家居食貧又如虞卿之窮愁著書辭旨益靜謐今所存者都性  
情真摯之作而壯盛時雄豪奔放者澄汰殆盡云云然論者輒  
謂澹翁佳什尙多均不見斯集豈原稿已散佚抑選錄時遺之

也其懷獻可翁云窮居有至樂一醉天地春讀書識大義至性敦親親頭昂傲裘馬目炯盲金銀課子亦多暇把釣星湖濱懷種水翁云茫茫大乾坤文章出萬手積沙高泰山揀金不盈斗前有竹垞翁後有樊榭叟水南村舍中榮名共不朽曹詩以真積力久爲功能揭其要頭昂十字亦非可翁不足當之按三公皆好學砥行同以明經老惟可翁以壻貴身後膺貤贈二品封典少慰方干於地下耳

南海譚玉生學博瑩多聞強記富有才華早年受知於阮文達公以駢體文馳名伍氏粵雅堂叢書是其校讐所代撰跋語皆詳核精確著有樂志堂詩集十二卷多沈博瑰麗之作如分江夜泊云春水漾春烟烟中泊畫船艣聲搖夢破燈影照愁先花絮東風節帆檣暮雨天客心孤迴處江月背人圓一語百媚極

似六朝人吐屬又落花云略有精神餘落照絕無情緒是東風  
我輩文章原跌宕美人身世總伶俜縱可勾留終似此誰當遲  
暮不淒然漫賦云斷無任俠真名士可有圓通大布衣陳寔自  
知交道廣陸機人詆賦才多寓園雜感云文人或者相傾慣名  
士休論所值多以上數聯皆刊落才華饒有寄托

玉生有賀桂星垣太史新婚詩六首其第四云宮錦花攢舊翦  
裁香濃曾染杏花回碧簫吹月乘鸞夜標格猶然小秀才自注  
靜志居詩話張宣字藻仲入翰林年未二十孝陵以小秀才呼  
之既奉詔歸娶邵亨貞學士送之以詩所傳紅錦裁雲春奠雁  
碧簫吹月夜乘鸞是也末首云豔福舊推袁大令六十<sub>平</sub>年後  
畫重題他時建豎知懸絕八秩齊眉獨與齊自注曾賓谷賞雨  
茅屋集有嘉慶丙辰題袁簡齋給假歸娶圖詩按明王稚欽詩



集內有送倫子畢娶歸七古一首云誰知弱冠親迎客已作君王侍從臣又平湖陳泰來字上交年十八舉於鄉十九釋褐歸娶賜內府金花燈籠知平湖縣劉抑亭贈以對聯云秋進士聯春進士大登科後小登科鄉里榮之又吳梅邨年二十舉崇禎辛未科會試第一廷試一甲二名進士及第時猶未娶特撤金蓮寶炬花幣冠帶賜歸里第完姻於明倫堂上行合巹禮見名家詩鈔小傳此皆給假歸娶故事也

嶺南自屈梁陳三家之後詩人代出嘉道間有稱爲粵東三子者則香山黃子實培芳陽春譚康侯敬昭番禺張南山維屏也南山詩名尤盛所輯國朝詩人徵略搜羅最廣別擇綦嚴凡名臣言行及有關國家掌故者附採尤詳足備一代文獻之徵不徒供吟壇擗摺已也性愛松嘗自謂松心子由道光壬午進士

官江西知縣有惠政丁父憂去再起援例改爲郡丞權知南康  
府事與諸生砥礪文行尋賦遂初寓居花埭時棹小舟嘯傲於  
烟波間因又號珠海老漁著有聽松廬詩鈔才力甚大學有根  
柢凡漢魏三唐以及近代各詩家俱能溯其源流醞釀變化以  
自成一家人之言古體如俠客行云貴人赫赫權如山門前鷹犬  
十百一日不得閒解一高堂華屋大酒肥肉粉白黛綠哀絲豪竹  
貴人不足解二貴人不足鷹犬僕僕天陰鬼哭解三鬼哭聲啾啾怪  
樹啼鵓鷓客從何方來下馬直上酒家樓解四寒風如刀雪如水  
酒家樓頭劍光起明日喧傳貴人死解五近體詩雄奇新警美不  
勝收如露寒蟲有怨花謝月無聊小雨月光濕微風松葉香霧  
氣侵窗濕河聲到枕寒美人千里外春思百花前肝膽只宜明  
月照性情先被古人知雲影貼波孤月定露光圓樹萬花涼花

月歡場胸有淚。江湖浪跡鬢成絲。孤墳月小。妖狐拜破寺。風多。  
老佛愁。雙柑釀暖聽鶯地。百草吹香射雉天。扇影衣香。三里霧。  
風廊水榭。百枝簫南海。月華今夜白。西山雲氣古。時青。一生不。  
幸稱詞客。萬古能豪是酒人。諸聯皆從大門庭中得來。

大興李壽君學博雲章五言律詩氣骨堅蒼。過陽朔東孫大令。  
澄云亂山遮曉日。客飯尙雞鳴。雲氣低連水。灘聲響入城。永平。  
道中云塞日盤雕影。山泥凍虎蹤。

海鹽朱粟珊廣文字樂甫晚號未樓有史文忠公墓詩云北望。  
朝朝拜杜鵑。小朝廷又痛南遷。千秋毅魄梅花嶺。一代新詞燕。  
子箋跋。屢每愁諸鎮悍。文章留與本朝傳。江南賸有虞山叟。  
紅豆花開拂綺筵。末爲褚公齒。令相形不堪。

幼時讀蘄水陳秋舫殿撰沆律賦。歎其精當。試帖亦與吳穀人。

抗行蓋殿撰天才駿亮筆墨不凡非時賢輩所能望其項領也  
古體詩如靈泉寺云萬樹結一綠蒼然成此山行入山際寺樹  
外疑無天我心忽蕩漾照見三靈泉泉性定且清物形視所遷  
流行與坎止外內符自然一杯且消渴吾意不在禪近體如送  
徐南墅歸蘄水云白石忽秋色燕山黃葉飛不堪爲客日獨此  
送君歸短榻留殘夢車聲動夕暉長途寒未已珍重檢征衣岳  
陽樓云第一樓頭小洞庭水光雲影畫冥冥幾人憂樂關天下  
終古東南圻地形積霧遠沈三戶白驚波高浴九疑青呼童且  
買君山酒醉卧闌干一客星數詩皆獨往獨來精悍無匹欲窺  
全豹當求簡學齋詩存讀之

丹徒布衣楊鑄字子堅號石瓢其詩飄飄欲仙清氣在骨以聽  
琴詩明月在水不在天秋聲在空不在絃二句傳誦於時有送

石處士游廬山寺云一峯一飛瀑流出洞邊雲雲裏不藏月山中來照君梅花何處好仙樂半空聞萬仞香爐頂高歌酒未醺甯陽黃石琴中承恩彤讀史有識嘗曰溫公仕於北宋北宋之得統有類於魏通鑑所以帝魏也朱子仕於南宋南宋之立國有類於蜀綱目所以帝蜀也持論甚正足息後儒聚訟非調停兩可之說也著有石琴詩稿其宿亢村驛一律頗雄壯詩云黃河滾滾接蒼溟落木蕭蕭古驛亭怒馬嘶風衰草白悲笳吹月夜燈青三霄北望瞻樞斗萬里南歸託使星遙指五雲最深處宮壺清漏記曾聽

長白文幹楨士道光初奉使西藏有辛巳紀程詩一卷自正月十二日從打箭爐入二月初十日行抵前藏所經歷皆係以詩如耐瘴先求藥防寒更檢衣導程排騎隊執役沸蠻音開門山

朗朗積雪樹森森。毳褐番頭目。礪樓土長官。徑折崖根細。絲縈  
咫尺許。寬地荒艱百。穀帳黑。富鳥犍。非把貽。殊重薪。炊價不廉盤。  
杆初日小。屏幃四山低。崖多鐫梵字。村只構僧房。徑塞奇。僵石  
崖盤鬱。律松塔院晴。飛鴿沙田暖。叱牛數聯夷。險殊致。皆紀實  
也。又言四山多積雪。天晴與日光相射。目不可開。過瓦合山。戒  
出聲。違則冰雹立至。丹達山頂有雪城。頗著靈異。雪消時結構  
隱現。可辨。遇嶺路陡險。肩輿難上。則以牯牛絙索引之。趨捷異  
常。雖輿夫稱健足者。不能及也。藏江有皮船。以牛革爲之。絕流  
而渡。雖水溜觸石。無敗裂虞。渡畢曳起。曝於沙際。附錄於此。以  
廣異聞。

山陰陳雪帆刺史鍾祥。以黔南僑籍。登道光辛卯賢書。少從江  
右吳蘭雪學。爲詩筮仕。後足跡半天下。不廢吟咏。都爲一集。曰

依隱齋詩鈔其宦蜀也嘗奉使察木多箸康郵草一卷察木多者古昌都地也輿地志後藏曰藏前藏曰衛昌都曰康桐城姚石甫廉訪瑩序之略曰元世郡縣實盡西藏之地明則不入版圖但謂之烏斯藏 本朝康熙季年乃復設王官以大臣鎮之自打箭爐外悉設臺站郵使歲時不絕而文人殊少吟咏乾隆末和泰庵尙書有西藏賦嘉慶中松湘浦相國顏惺甫尙書有紀事圖詩而王我師馬若虛諸人則從事幕府作爲篇什紀咏亦第形其陋惡而已道光甲辰乙巳間余再奉使察木多嘗爲康衛紀行十六卷亦間有詩歌然無多也息帆以丁未之春繼使其地八月歸成都成古今體詩若干首云云其康衛吟十六首乃專咏衛中風土今但錄鴉頭一首以槩其餘雅頭者蕃女無貴賤老幼皆呼爲雅頭詩云雅頭年十五含情辭阿母戍人

未有婦鴉頭本無夫何以結同心一串紅珊瑚珊瑚結作佩璫  
瑜裁爲裳不受脂粉污盥櫛生容光嫁夫事居積三年儼成室  
一朝滿戍去獨送還鄉邑旣送故人去還迎新人來生男或攜  
歸生女留戍臺戍臺瞰巴蜀新舊往來續送故復迎新老大身  
誰屬雜還醉冲房蕃人謂酒爲冲調笑跳歌莊鴉頭自行樂歲  
歲爲經常

松陵漁人嘗於鶯脰湖中撈得小玉印一方有好事者摩抄拂  
拭讀其文乃篆刻岳飛二字喜極亟購歸珍藏徧徵題咏盛迦  
生表兄曾見一長卷前幅卽鈐此印文題者多名人各騁才情  
長篇巨製推波助瀾惟嚴問樵太史葆庸只四言八句簡練驪  
括直攫驪珠不得不推爲老作手爲余誦之曰墨字涅背將軍  
戮力金字鐫牌將軍飲泣三字獄成將軍不活兩字印出將軍



不滅雖鄂王萬古之名不因斯印增重然亦不失爲尊題法也  
梅里李次白貽德字天彝又號杏邨嘉慶戊寅舉人生平博覽  
經史著作不休爲孫淵如觀察王伯申尙書所契重晚年歿於  
京師遺稿盡失惟存攬春閣詩集而已訪陽明先生故里云聞  
道天皇信健兒御驄慣向酒家馳中興不仗文成策武廟重看  
靖難師理學幾人能用世宗稱公爲有用理學世儒何苦詆良知竭來  
故里披餘韻也算春風坐罷時持平之論亦不刊之論尤工於  
言情七月十五夜云水輪圓處轉蕭蕭如此芳華竟早凋雙照  
記他前度月半生無此可憐宵入房膽小人何在索乳聲悽女  
太嬌弄玉不煩蕭史引秦樓空賸一枝簫此係悼亡之作凄惋  
極矣又拜先人墓句祭不能豐養可知翻用前人語傷心之言  
不堪卒讀

趙直夫孝廉本敷貴州獲安人有學道堂詩鈔華麓訪顧亭林  
先生故址云黃冠天地一身輕白首關河萬里行蓮社詩題晉  
處士漢家名重魯諸生園林麥飯懸雙淚故國銅駝痛二京爲  
問江東幾遺老黎州真不負初盟字字實錄足抵一篇小傳  
桐鄉陸費春颿中丞璵爲丹叔先生之孫阮文達公稱其詩蘊  
藉風華陶寫清淑今讀其真息齋詩鈔格律性靈兼擅其勝古  
體如由冷泉亭循竹徑登韜光寺云嵐翠撲半空飛泉激清響  
豁達開陽坂寺門翠森爽入門右偏曲異境怯孤往紆回烟靄  
閒萬狀一仰客天津云孤城背海上日出臨大荒濤聲走碣  
石萬流束巨防夜訪同人清玉山堂云遙鐘墮寥廓一白涼烟  
生到門人影溼素月流無聲題大江泛月圖云明月幾時有大  
江流向東誰持白玉盤擲此銀海中靜默寺云竹影白於水月

氣浮空庭。秋懷云桐陰。瀉涼翠桂樹。流濕光近體。如夜坐云。暝  
樹抱星影。濕苔流露光。清磬閉杉閣。古燈搖竹房。納涼云。月明  
雙鶴警。風定一螢高。棗花寺云。僧臘蒼松古。禪心白日閒。斜門  
花外徑。遙磬雨中山。出郭云。溪禽知避席。官馬不驚人。上巳日  
花下云。筋力漸於移。石軟性情惟。有乞花食。雨春館卽事云。松  
鼠落檐桐吐乳。竊龍穿徑箠行鞭。與仲雲制軍詩足稱二難  
歛縣徐廉峰太史寶善其論詩謂必剛柔相濟詩之柔莫如白  
而其剛在骨詩之剛莫如韓而其柔在骨世之學韓白者多失  
之余謂太史之論固妙然謂白詩柔而剛在骨則可謂韓詩剛  
而柔在骨則不可骨旣柔矣復何所爲剛蓋韓之剛而不入生  
硬者所謂百鍊剛化爲繞指柔非柔在骨也太史能詩決不作  
此語殆傳之失其實也寄懷郭羽可云。十上不中第。白頭還故

鄉江山倦行役。天地立蒼茫。共影月千里。離情雁一行。蕭蕭讀  
君畫。風雨滿空堂。四十字一氣健舉。

小苑菴詩話卷八

嘉興吳仰賢牧騶輯

吾宗自前明正德間義門公偕弟東溪公以休甯諸生先後至  
禾中講學邑人士愛而留之卒葬春波里江家橋世稱二吳先  
生學使薛方山先生有傳後嗣遂占籍嘉興六傳至旭昭公附  
貢生績學勵行好善樂施康熙壬寅雍正壬子兩次助賑事載  
志乘嘗延里中名宿紹成莘田二陸先生枚士徐先生爲師課  
予高伯祖行唐公高祖桃源公最後得錢塘張甫桑先生尤深  
契洽以爲經師人師胥在是矣行唐公先秉鐸山陰輯蘭亭志  
十二卷以旭昭公所撰右軍論及遺墨數種附刻志後乾隆八  
年癸亥行唐公昆季偕同人隨桑先生禊飲蘭亭賦詩以清流  
激湍映帶左右爲韻桑先生詩得流字曰及時貴行樂涉趣來

林邱選勝蘭上里披豁偕良儔習習仁風扇益益春波流菁華  
發蒼幹蘋苹濠芳洲陟巘挂吟杖隨波棹觴舟天機玩魚躍巖  
巖酬禽謳日莫不知返月光林端浮竹影阻歸徑以爲佳客留  
行唐公詩得映字曰言從杖履游一篙破湖鏡綠陰竹樹濃碧  
瀾萍藻淨萬壑激琮琤連峰遞掩映天氣豁晴和被除應韶令  
故事踵王謝幽興託游泳諸公川上觀狂亦舞雲詠小大泯鴟  
鵬逍遙各遂性今日蘭上羣不數永和盛桃源公詩得右字曰  
上辰鶯鳥鳴水注桃花候蘭渚往游之敬從耆英後俯玩水苔  
榮仰瞻林木秀高嶺列亭前清湍縈檻右遠岫淡修眉淺綠畫  
新就高唱永日酬長箋末座授音叶韶濩鳴韻遏管絃奏薄暮  
川上歸月上餘霞收數詩皆追摹典午風裁平淡古穆不以絺  
章繪句爲工也行唐公諱高增字敬齋歲貢生桃源公諱高竣

字壽亭乾隆辛酉科舉人

會伯祖豐山公諱鏞號石鐘行唐公長子乾隆己卯舉人官湖南乾州直隸同知工詩顧不多作遺稿僅百餘篇古體如中丞雨爲孫補山先生作云嶺南久不雨厥田堅于石耕犁不得施春半已虛擲誰歟心如焚農夫與中丞農夫僅百畝憂來尙填膺中丞萬農夫爲憂不可勝掩關亟齋宿步禱趁晨興其日雨始作食頃但廉纖顙請閱三日再雨意未厭白雲山高三百丈綫路詰曲不可上中丞年已六十六腳鞢履險平如掌辦香徑投白雲寺下酌聖水貯盆盎迎歸一一置壇壝脫冠磬磕聞搏顙軒蓋屏長衢鼓角停轅門責躬恨不至以實不以文俄然天宇變昏黑彌空靄靄雲何繁是夕宵中五十刻春漏沈沈春雨喧曉來雨勢欲入戶自卯滂沱更至午萬人譁噪井一聲聲聲

喚作中丞雨中丞。禱雨非始今。一心精白神所欽。作詩非頌中丞雨。敢爲凡百有位箴。近體如竹牀云琅玕作臥榻。幽事在茅堂已坦便。腹猶聞細細香。雨憐方外對。暑向箇中忘。熱客知何限。從渠自下牀。藤枕云角枕。瓊璫甚蠻藤。結構初清涼。同枕石。空洞易藏書。高聽江聲轉。欹懷剡曲居。晝眠忘起坐。短髮鑷應疎。將至芷江迎。寄陶愷亭四兄云。與君月夕并花晨。促席經年。事事新。句到爭奇恒慘澹。棋逢算劫偶貪嗔。縱教世味甘來好。畢竟交情淡處真。後夜離憂期共訴。杯盤草草酌湘醇。數詩沈著細賦。皆于曝書亭爲近。公尤精于駢體。其啟事等作屬辭比事情文相生。頗擅才子之勝。

曾叔祖卓倫公諱士鏡。乾隆庚寅恩科舉人。僅一赴禮闈。卽卒。子飲淥公諱師澄。字晴佳。邑廩生。負才名。善吟咏。嘗受知于



阮文達公年未四十赴召玉樓士林惜之詩稿無存從弟晉仙  
搜訪得七古二章僅酬應之作惟有曝書亭一首刻入浙江詩  
課云舊史梅溪宅書亭展畫圖倦游耽著述投老足清娛射鵰  
人何在鈔書跡已無荷花池畔路猶說小長蘆

從祖餘山公諱延長生平酷嗜書畫工鑒別收藏甚富嘗客游  
邗上依吾鄉錢恬齋都轉所結交皆老蒼繪有小梅花菴圖孫  
淵如觀察以篆書署額題者甚眾今已付劫灰惟從思適齋集  
中見顧澗蘋題句云探春秉燭共天涯董相祠邊興未賒何似  
魏塘還鄧尉與君各看故園花公亦能詩惜不存稿僅見題南  
野草堂詩集一律云清才無敵吾宗老脫口詩篇萬手抄名士  
到門爭下拜上公折節徧論交青衫渤海游方倦白髮田園夢  
未拋從此竹林多快事問奇長許叩衡茅

從叔嘯江公諱昌榮自號蘇門山人爲豐山公孫自少酷嗜吟  
咏不屑屑營制舉業年逾三十始補弟子員一踏秋闈卽絕意  
進取專力攻詩于歷代詩家源流博覽約取功候甚深性耿介  
慎交游見世上噉名子避之若浼而時就余譚藝甚樂竟日語  
不及他積稿甚富勇于芟蕪咸豐乙卯自梓其詩爲登嘯集僅  
二卷太倉畢君華珍序之稱其近體清新長篇浩汗蓋辨香唐  
賢參以蘇黃諸老迴非時調云云洵定論也絕句尤有神韻如  
韋公祠云公亦何勞愧俸錢蘇州祠古踞山巔依然燕寢凝香  
坐微雨涼生薄暮天秋日偕計雲鶴游雁湖云挈伴來游笑拍  
肩橫堤蘆繞雁湖邊長吟望斷征帆影十里西風吹蛤天鷓鴣  
衝起掠烟輕一角斜陽柳外明小倚江亭吹鐵笛白波打岸作  
潮聲

從叔中丞公少村先生遠宦粵東由知縣洊歷方伯垂二十年  
同治甲子夏擢撫楚北都人士于其行也繪穗城棠頌圖廣  
徵詩章以贈別其駢儷一序爲譚玉生學博之子孝廉懋安所  
作文極閎肆題咏者凡二十餘人內有番禺陳蘭甫學博澧五  
言一首爲簡老詩曰中丞始釋褐宦粵作州縣敷歷至方伯特  
達荷天眷其閒劇勞苦大小數十戰利器別盤錯大任先磨  
鍊行軍旣果毅理民更廉善優優政已敷懇懇意無倦名高風  
度樓詔下通明殿擢公撫楚北聞命卽馳傳楚民歡如雷  
粵民涕如霰羊城十萬家攀轅競祖餞請告羊城人勿作一孔  
見公如泰山雲霖雨天下徧書法酷類蘇齋冊端四大字亦蘭  
甫所署篆法圓勁古厚非時手所及

中丞公父贈資政古村公隱居不仕偉軀幹喜豪飲性情坦易

雖屢空未嘗有戚戚容與人交外和而內介生平樽酒追歡之  
偶久而不狎遇親故中有齟齬事輒談笑以解以故人樂就之  
嘗繪小影現布袋和尚相處明經光祖題云肩挑布袋不受五  
戒逢葷便吃見佛不拜飲般若湯說無生話彌勒前生金剛不  
壞大笑哈哈行徑古怪我放慧眼覷爾狹獍行鉢李如虎題曰  
此大腹中我道有平等心在焉此布袋內爲金錢耶爲粟米耶  
又道這副嘴臉所樂不存也索性替他商量做進一步工夫則  
併此肩頭物掉下了豈非更覺自在其餘題者尙多不如二君  
之辭旨超脫也

余之受知以長白瑞端節師爲最先亦最深公諱元字容堂號  
少梅爲鐵冶亭尙書季子道光辛巳舉人尙書公屢掌文衡當  
道光初其小門生輩已躋卿貳見公必呼世叔時有京城世叔

之稱顧公性落落來修世好者報謁之否則未嘗一通聲氣由  
刑部郎出守我郡累擢至福建布政使改授新疆辦事大臣回  
翔塞外者幾十年庚戌召還授頭等侍衛文宗顯皇帝登  
極復有新疆之役召見垂詢家世甚詳始知公固由科目而  
厯官中外者也于是改命陳臬鄂省嚮用甚篤建鉞在指顧  
閒矣時粵寇方熾旋逼武昌公竭力籌贊守禦之策城陷趣侍  
姬某自盡手刃其幼子自刎以殉在鄂省死難諸臣中爲最烈  
奏入贈太常寺卿賜諡端節其守我郡日多惠政有通判丁  
某分防王家涇虐其民眾噪于署丁恚甚自投其印井中而以  
被劫報上游檄公查辦公廉得其實懲其鄉民之滋事者而丁  
亦褫戍去無左右袒乙未浙江鄉試公充內監試官察臈錄處  
積弊向有買臈草臈之分買臈者發臈在先而草臈卷抑後且

字迹惡劣不堪入目故每科由草謄卷而中式者極少公立法  
禁止不論某郡之卷隨到隨發謄寫草率者懲之諸執事吏不  
得上下其手是科我郡中式者二十餘人多知名士士望大孚  
重新篤湖書院增給生童膏火資而延嘉善黃霽青先生主講  
席制藝外兼課以詩賦每課擇其尤者陸續付梓凡有佳篇朝  
傳誦而夕登版士爭奮勵斐然可觀經公所賞識先後入詞林  
官曹署者甚眾在京門下之盛不亞于典試諸君公尤與吾邑  
張叔未解元相契後在塞外猶時以詩筒往還所作詩原本性  
情一宗大雅嘗以九老詩課士有擬作如老幕云千里聘書爭  
勸駕一枝筆力重如山案惟久判心逾細律到能通鬢已斑老  
僧云一世忙來惟粥飯幾身修得到公卿老漁云白頭唱晚聲  
聲緩赤足沽春步步難老優云喉舌待調新子弟琵琶猶憶舊

君王老丐云一飯酬難知已徧六街踏到暮年平諸聯皆膾炙人口曩在都中曾披讀十六研齋詩集見有謁椒山先生祠云死生三奏疏夫婦兩完人挽某公殉難云人生誰不死何幸死疆場然則公之致命遂志素所蓄積然也公子維之古香咸豐辛亥同榜舉人維之名延楨世襲騎都尉官工部郎已卒古香名延楷由御史出守閩中

阮梅叔亨爲儀徵相國弟嘉慶戊寅副貢性耽吟咏不樂仕進亦今之馬少游也嘗作蕉花曲傳誦輦下一時稱爲阮蕉花渡錢塘云鄉心似月三秋滿詩思迎潮一線來又歲暮書懷云帖臨乞米年來慣一事無成兩鬢絲竟不似貴介口中語

吳縣潘功甫內翰曾沂號瑟菴嘉慶丙子舉人爲文恭相國長君塵視軒冕棲心禪宗鄉里善舉恒傾資任之晚歲杜門卻軌

偶出則諸貧民陰伺前後或投水或號哭作種種窘迫狀以希  
拯濟蓋素知公惻怛存心聞聲尋救者也以咸豐癸丑臘月卒  
是時粵匪陷金陵風鶴戒嚴蘇民皆恃公無恐至是闔城驚惶  
江叔挽詩云是時賊眾日東下將越天塹窺吳中無公保障  
眾乃懼即日遷徙城爲空實錄也著有功甫小集如禪心靜流  
水詩骨澹梅花古香經一縛溝磬屋三椽野竹寒無葉山薑病  
有花愁雲頽怪石古木立寒鴉宿東平州云莫雨投他縣梅花  
斷此間皆古澹無俗調又揚州懷古云天意已難容李特朝家  
無計殺高昂贈蔣丈攸銛云妄吏盡能談水利重臣兼欲顧河  
防則又語帶激昂知公非無意于斯世也

仁和馬秋菴太常履泰作楊鬍子歌楊鬍子者昭勇侯楊忠武  
遇春長髯善戰每臨陣挽髯爲結揮大刀而前賊望見驚呼曰



須避楊鬍子故爲作歌云賊怕楊鬍子賊怕鬍子走脫趾不怕

白鬍大尾羊

時有總兵姓羊

只怕黑鬍楊難當賊正蒼皇疑未決瞥見

鬍子擲身入刀嫌太快矛太尖只使一條鐵馬鞭逢人搥人馬

拋馬血肉都成囊中鮓須臾將士風湧波縱橫步騎從一騾賊

忽乘高石如雨鬍子鞭已空中舉賊忽走險奔如蛇鬍子騾已

橫道遮森森賊寨密排壘鬍子從外陷其內重重賊隊圍如帶

鬍子從內潰其外鬍子鞭騾繞賊走吞賊胸中已八九瞋目一

叱鬍槎枒賊皆撲地爲蟲沙相傳失路曾問賊賊指間道教鬍

出賊甯不怨鬍子鞭頗聞鬍子爲將賢鬍子待士如骨肉蟻大

功勞無不錄拔擢真能任鼓鼙拊循含淚吮瘡痍噫嘻賊中感

服尙如此豈有官軍肯惜死此詩寫得盪魄憂魂毛髮欲跋不

啻從壁上觀羸項嬰戰時也然在杜詩只身輕一鳥過槍急萬

人呼十字足概之矣浣花翁所以爲詩中之聖

戴文節公醕士先生兩督粵東學粵中山水雄奇大恣吟眺  
其詩爲訪粵集與何子貞太史使黔草異曲同工足爲山靈寫  
照自惠州至潮州舟中看山水云灘水挾石去灘石挽水住去  
住兩不決水怒石亦怒水石自相怒空令見者怖不如鼓柁人  
昂首不回顧又云南山苦多骨北山苦多肉多骨最堅瘦多肉  
蕃草木居民愛北山築室當其腹遙見炊烟起裊裊出修竹南  
山杳無人白雲滿空谷含洸廠云山高日出遲空翠相摩盪錦  
浪灘云沸水山崩奔禿石下環衛盪決作飛雨倒洒江天霽溜  
急萬篙戰風緊羣許厲掀篷望三峽亂峯插雲際瀑云積水破  
石出水堅石不敵石起抵其隙壘作千仞壁水從壁上觀挾石  
下排擊欲下不得下倒洒飛雨滴九天落星辰萬古轟霹靂松

簞盡呼舞懸崖各奮激。峽山寺云朝陽閃寒溜。涼風奏清樾。石  
氣潤人衣。山花落我髮。卻願崖上樹。各自踞硤砢。長根走尋土。  
瘦筋絡石骨。

訪粵集中佳句尙多大。抵景真若畫情真若話。近體五言如峽  
險山圍驛。江雪月盪波。客從行路老。詩入宦囊多。碧花銅鼓繡  
翠髮。石人披野橘。先霜熟山茶。帶雨肥驛暗。連榕樹村荒。擁蔗  
田。樹碧風搖畫。花香雨漲春。風圍雲作絮。石漱浪生花。七言如  
才人學畫忘形似。高手圍棋讓敵先。歲暮團圞貧亦好。路遙歸  
去夢都難。

何子貞太史詩意在筆先。清超瘦硬。洗盡鉛華。其模寫山水處  
尤能獨開生面。東洲草堂全集中。使黔草一帙。境奇詩奇。筆力  
相副。如辰龍關云。山外忽見天天外。復有山。山天不相讓。盡作

辰龍閣灘行云山下千里江江下千里山荒山載亂水百里爲  
一灘又云風力脅灘起百丈不可落聲喧百雷靈白舞千鶴鶴  
亂水云亂水無正流亂山無正峯直立側立石橫生倒生松清  
風颯然至澗壑千笙鏞是能于少陵東坡兩家詠山水詩外另  
具一副筆墨又律句如武陵曉發云新粳米熟桃花洞苦笋林  
香葛府山野人家云土美雨增瓜豆力草香晴健馬牛牙亦無  
一點甜熟氣

梁元帝春日詩用二十三春字鮑泉奉和亦用二十九新字淵  
明止酒詩用二十止字近何子貞太史作飛雲巖詩用六十一  
雲字俶儻瑰琦晃人心目結云寄語看詩讀記人我所道雲都  
是石一語點晴使滿紙烟雲俱有歸宿

汪适孫藏一唐鏡銘日照日蒨花出臨池滿月生官看巾帽整

妾映點粧成證以查初白金陵雜咏知爲河東君物戴文節爲  
賦柳靡蕪粧鏡詞六絕句第四首云擊碎金甌翠黛顰勤王有  
志總成塵妾心鏡面即心背文字蟠胸不照人一香奩題發如  
許議論亦正大亦帖切那得不拍案叫絕眞絕唱也又云祔衣  
入道鬢慵梳從此粧臺夜月虛鏡若有知當早破不教巾帽換  
尙書亦嚴冷

長洲相國彭文敬師督學福建時有政和縣監生某屋後圍牆  
蠣粉脫落露出城甃六塊縣令詳請照違制斥革訊究公判曰  
田宅踰制固憲典所必加羅織成冤亦糾參所不貸監生某行  
非梟獍居本蓬蒿牆內城甃難科違制數僅同于六鷁非有百  
雉之觀屋復購自十年已閱兩家之業欲指爲盜竊則毀城證  
自何人欲擬以僭踰則築室成于誰氏况蠣粉剝而始見知出

無心若薑尾令而必行。是爲枉法。雖允視肇之請。聊紆刻木之  
銜。其事遂寢。士林頌之。公胚胎前光。舊畚經訓。尤喜研究程朱  
之學。嘗受業于王惕甫先生。所作詩古文辭。皆有法度。仕至三  
公。而生後不名一錢。相傳公前身爲天台僧。筆玉故性行高潔。  
終日欽欽。能以小心肩大任。非尋常慧業文人比也。著有松風  
閣詩二十六卷。歸樸龜穀稿正續十六卷。

文敬公少時有田家四時吟。冬云。簞車上西疇。西疇刈稻時。閉  
門春石臼。當風揚竹箕。相將輸稅去。多寡卻不知。何用識多寡。  
父母不我欺。我田亦云少。猶贍來歲糜。豈惟三冬日。可以無寒  
飢。讀此如置身三代盛時。咸豐王子秋懷八首之一曰。莫將經  
濟誤蒼生。制度由來重變更。新法必行終亂宋。驛夫無賴竟亡  
明。只祈水旱天灾少。不患錢刀內府傾。欲盡十年休養術。先聽

鼙鼓罷南征時公入直樞廷蒿目時艱立言正大

道光庚戌余春闈報罷館于新安曹氏課文正曾孫知文正當日退朝後猶手不釋卷嘗手撚經語作對自二字以至數字分經彙輯鱗次成編彭文敬挽公詩有書比秀才熟心忘元老尊句最爲切合已刻者惟咏史七律二百首皆咏史傳中人專就本傳比事屬辭不著議論獨咏楊太真云權挾將軍何有變禍歸如子卻無端方嚴如文正亦復左袒肥婢令人想見魏公嫵媚

會文正公古文辭在本朝實一大作手由其博極羣書諳悉掌故而又語語準情酌理而出不激不隨具有儒者氣象獨詩則奧衍恢奇跌宕自喜大致以杜韓爲宗而參以山谷其感懷述事七律十六首對仗工整音節和平又儼然西崑體也集中

有題唐鏡海先生十月戎行圖云。生世不能學夔皋。裁量帝載歸甄陶。猶當下同郭。與李手提兩京還。天子數語若公自操左券。是時粵匪未蠹動。公但簪筆從容而心聲之發露如此。范文正爲秀才時。以天下自任。劉文成題釣渭圖。隱以帝師自命。古今同符矣。又有句云。明月當天萬瓦霜。尋常寫景語。是何等氣魄。

文正有傲奴詩曰。君不見蕭郎老僕如家雞。十年管楚心不攜。君不見卓氏雄資冠西蜀。頃使千人百人伏。今我何爲獨不然。胸中無學手無錢。平生意氣自許頗。誰知傲奴乃過我。昨者一語天地睽。公然對面相勃谿。傲奴誹我未賢聖。我坐傲奴小不敬。拂衣一去何翩翩。可憐傲骨撐青天。噫嘻乎傲奴安得好風吹汝朱門權。要地看汝倉皇換骨生。百媚胸無學公謙詞手無。



錢乃真狀耳。夫以指揮三軍出將入相之身，當其爲京朝官，無柰一傲奴何。吾讀公詩而喟然歎。吾又讀江叔之詩，未常不破涕爲笑也。叔之詩曰：有僮從我來，今朝告我去。問汝去何方，曰：尋喫飯處。與我衣與裳，猶可七日糧。更爲五日留，于汝亦不傷。答言：身作僕，原是逐口腹。從主杭州來，百飯百不肉。不肉還自可，不飯愁殺我。欲去那復留，坐待不舉火。況主官太卑，直同與僮。與僮復役我，豈非欺我哉。他官作計全，挾資累萬千。以母錢爲官，自可招子錢。主今空兩手，餓來卻張口。除是吸西湖，西風吸得否。何路不稍寬，必做蠹樣官。冬衣旣典盡，冬至方嚴寒。僮言一何直，主人重歎息。彼以飢故逃，我飢逃不得。此詩擅滑稽之雄。

摹古者汨真，諧俗者損骨。偏勝之弊，交相詬病。求其以昌黎之

筆寫樂天之情鎔山谷誠齋爲一鑪實不多觀今於長洲江殷  
叔湜之詩遇之敬叔詩得力于昌黎居多其用筆能鍊剛爲柔  
莊謔並作又善敘極瑣鄙事凡筆所難達無不披卻導窾直而  
不率淺而不俚真能于詩界中自闢畦町一洗榛蕪者也凡遭  
亂以來死生契闊流離奔竄之感一一寓之于詩憶集中有句  
云人倫生處缺鬼趣死前來此十字足以括之閱之令人不歡  
後宦浙中浮沉一官賁志而沒同里彭文敬相國序其伏歆堂  
詩謂爲之于舉世不爲之曰比之近代震川之文崆峒之詩許  
其必傳

福州林薌谿昌彝有小體詩曰君勿爲名士名士本如倡誰賞  
眞顏色空作野鴛鴦江敬叔愛之倣其體作曰君勿爲名士名  
士如驛馬瘦骨高于山萬里在足下瘦骨十字黃山谷死後無

人解道此

張曉峯觀察開霽湖南永綏人道光乙酉以拔貢登賢書橐筆  
佐戎幕以殺賊功洊擢至監司晚歲流寓鄂垣以吟咏自娛意  
鬱然也詩筆豪健其近體詩硬語盤空與長洲江崧叔相近一  
掃浮爛應酬之習如荊州雜咏曰簪纓貴公子謂祿湖宦不挈  
妻孥人頌曰廉吏自呼爲酒徒脫然早辭世感者舊惟吾猶鮑  
叔干管能知是丈夫題吳春谷守樊圖云高牙大纛者誰氏但  
守襄陽不守樊君獨力排羣議出直教賊望陣雲奔爪牙可恃  
人偏忌唇齒能全功孰論父老昨聞唐鄧警北門尙冀一憑垣  
權松滋令裴金和爲鄂垣蜚語所中感其事而慰以詩云從來  
眞盜必嚴捕非盜甯容妄坐之定案而愿莫須有殺人邊問爾  
爲誰君方慎以矜民命或乃疑其徇己私雖是青蠅能點白繡

衣使者早先知觀察四子世繩歿于江西其母妻攜幼扶觀歸  
鄂寓見兩孫孩有作云還道父官其地好誰知母失所天哀句  
法險而穩

唐人許用晦唐堯賓詩多近體非不能作古風不强爲也信陽  
郭萼香刺史鑑庚嘉慶己卯進士官游滇蜀最久所著海粟齋  
詩鈔正續十五卷專攻近體格不甚高皆能自寄性情實勝于  
時賢之造作剽竊者嘗居邠五年有憶復穴舊游云一層石洞  
一層梯洞古山高壁立齊槐里陰濃三代樹桃源日午一聲雞  
紅裙婦女嫺鞍馬黃口兒童采薇藜惆悵東歸多失算襄城過  
去路途迷甲子元旦云上元甲子又新春三有書祥率土賓  
聖祖神孫千載遇青衫紅笠五朝人略嫌筋力還爲禮難遣  
湖山未了因按日鈔書過一紀平心也算好精神無題云閒悶

閒愁又幾旬。自翻歷日數殘春。羊車返後音長斷。蟾魄圓時約未真。飄泊燕巢傷舊主。模糊鸚鵡語罵何人。近來不把修眉掃。爲怕當行姊妹嗔。其他佳句如蠻山晴日少。蜀水逆流多。瀘州六代鶯花黃葉寺。一江風雨白門潮。金陵清如菜味何妨淡。瘦到梅花不礙香。人到奇窮呼父母。地留餘恨缺東南。名士自撾丞相鼓。豎儒竟撼岳家軍。天亦有情濃下淚。人誰乞巧再登樓。閩雨夕有小別。東風如隔世。不經南浦已銷魂。秋草水打城頭能走石。山無谷口不通風。英雄養晦橋邊屨。骨肉寒心俎上羹。水如過客穿城去。雲擁諸峯倒地來。雨月明古驛橋初凍。雪滿空山鶴未回。梅漢皋秋柳將軍照。湖畔梅花處士家。未必明年還在此。可能今日不登樓。林深狼虎隨人出。天遠牛羊帶日回。紅葉亂遮雲裏寺。黃花開瘦雨中山。杯酒三巡防失德。菜根一飽有

餘香卅載狐裘無暖氣五更雞唱八春聲除夕李杜未登千佛  
籍巢由不費一山錢落葉隨風遞去路分花許我到來春盤內  
離其珍似玉街頭不托小千錢杜老獠奴惟阿段石家慧婢有  
翔風雲到歸山難作雨僧猶帶髮不參禪蜀道千盤難立馬涇  
泥五斗不生魚

海鹽黃韻珊大令燮清初名憲清字韻甫道光乙未舉人早擅  
才華所著帝女花諸傳奇以秦柳之新詞奏康王之法曲海內  
醉心焉六上春明與日下諸名流推襟送抱極文酒之歡公卿  
爭折節下交貌寢如飛卿而口多微辭嘗與陸眉生太史散步  
銅街偶過翰林院笑謂太史云余有集唐二句可作署聯陸詰  
其語朗誦云是中綽約多仙子未有涓埃答聖朝聞者雖以爲  
謔莫不歎其工切無如文章憎命饑鳳難翔晚就縣令需次武

昌宓琴未彈桐棺早降沒後中郎無嗣書劍飄零才豐遇齋亦  
可哀已著有倚晴樓詩集十二卷大抵溫李體格元白才情劍  
氣珠光鬱爲寶貴至其高處亦能得杜藩離近體如出都感懷  
四首云愁絕尊前懊惱歌一年春事暗消磨杏花細雨疎簾隔  
桃葉東風別院多素手未諳依樣銷翠眉嬾學入時蛾璫龍玉  
佩誰堪贈盡日微雲掩絳河其草草芳華過眼新鈿車應悔入  
紅塵薜蘿道遠難爲別芍藥花殘不是春晚閣疎燈涼照影曉  
窗明鏡暗傷神天台自守神仙戒肯煮胡麻引路人其願影春  
流瘦欲仙早知顏色悞嬋娟明珠羞託良媒獻翠袖惟邀侍女  
憐胡蝶繡成思好夢空篴音苦感華年傷心不及盧家婦十五  
盈盈玉比肩其擬譜閒愁入素琴幽蘭淒苑有餘音浣紗門巷  
仍芳草飛絮樓臺易綠陰紫燕歸來春寂寂青鸞飛去信沈沈

寶珠壓線尋常事難慰桑榆阿母心其四聞督臣收復定海四首

云祲霧蒸雲薄太虛從容巾扇爲驅除健兒鼓吹騰蛟室吏部

文章徒鱷魚碧血未乾田橫島黃金誰致趙佗書始知力戰非

長策地下忠魂恨有餘其一雨洗銀河毒障開旌旗安穩甬東來

扶桑日照天王地細柳春深大將臺化外環球歸禹貢劫餘草

木帶秦灰流離莫問當年事嗚咽重添父老哀其二廢壘荒林戰

骨枯竹山門外莽烟蕪秋風化去滄浪劍明月歸來綠水珠尙

有餘腥留滬濱可能遠勢控澎湖殘民元氣應調攝溫詔頻

年已賜租其三星宿遙通貫月槎亂檣西去指流沙雲中島嶼收

徐海天外樓船走呂嘉玉馬三千留外府金鼇一柱表中華承

平豈便忘征戰列戍連屯赴暮笳其四

韻珊集中近體尙多佳句五言如泉聲上方落茶味本山濃杖



履無時態鐘彝足古

歡贈張叔未

鬚眉沾冰雪歌哭老乾坤

晚陳歸健齋

心赴落日秋氣上高臺

遠村明積雪凍樹活炊烟樓高延海月

城缺露秋山得月樹陰秀在風薜葉香古佛無煩惱空山亦老

舊山積百蠻氣江流千古聲七言如東風三月鳥相語紅雨一

窗花有聲斜陽一院鳥爭樹落葉半山人叩門客路東風正芳

草故人歸夢及梅花盡日東風吹白雨今年寒食似黃梅遠岸

不山偏秀折畫橋無月亦空明閒裏看山如對友倦時投店勝

歸家寶馬連錢花外路玉人團扇鏡中樓山連炎微千峯赤天

人滄浪一綫青蓮窗香霧秋人髮水檻紅雲夜市燈諸聯格不

甚高卻如裙屐風流非儔父所能近

小匏菴詩話卷九

嘉興吳仰賢牧騶輯

長興朱立齋廣文紫貴家吳江著有楓江草堂詩稿未刊七言歌行足以嗣響竹垞光緒丁丑冬錢子密京卿攜示一冊則起卷四終卷八而亡其前數卷然佳章極多茲錄七古一首題馬士英爲杜文煥畫錦霞洞天圖云蔡京筆法儕蘇黃稷帖八百半閒堂自來纖兒誤人國未必襪線無寸長請看貴陽馬瑤草畫手居然能擅場舊傳鳳陽罷督日宗師北苑許入室是卷着墨何蕭疏應是當年得意筆百圍喬木高參天雲梯石磴相鉤連此中風景正殊絕焉知滄海成桑田北風吹折白門柳黯然王氣銷鍾阜長江天塹竟如何撞破家居是此手征南後裔髯將軍曾擁節旌清邊塵賸水殘山縱可寫胡爲倩此煬龍人還

君顧廚且收貯笑爲老奸著評語略同畫竹韓平原差勝弄麈  
李林甫此篇運使卷軸語有激射不同浪逞才情七言近體如  
上已喜雨云水價應從今日減檐聲還是去年聽答張千里云  
草堂人日酬高適細雨簷花酌鄭虔郡齋遣興云數仞牆邊打  
頭屋百僚班底折腰人又在溫州學齋云沿街牆比竹籬短帖  
水橋如板橋低吐屬新穎

錢唐張仲甫舍人應昌世襲簪纓淡于仕進終歲鍵戶著書富  
蓄金石所著彝壽軒詩鈔中有七古一篇筆力瘦硬奄有坡谷  
之勝題曰魏稼孫錫曾避亂至福州所蓄金石器拓不失而求  
古之興倍勇寄示詠金石近詩殊增我割愛去鄉之痛也長歌  
寄答云吾家軒以彝壽名周邢叔鐘大寶鎮吾老以鐘歸於劉  
燕庭秘藏墨拓富題詠其餘小物多吉金古色璘璫珠照乘駢

方伯

羅几案玉石閒雜以花。寶哥汝定最勝都承器百種。歷代元號  
確攷證商周秦漢逮元明。制作精神發光瑩。伴我鮐背鶴髮翁。  
終老此生宜其命。欻然蟻聚來鼓鼙。皇然鹿走逃。陷奔擔簦負  
笈奔長途。翰墨圖書皆贅臆。矧此犖犖礪礪者。更如棄屣如墮  
甌。故鄉殘喘延暫時。大劫重遭靡遺燼。寶山回首悲悔多。盡化  
烟雲存者僅千里。取攜百一耳。漢廿九印宋一印。余行笈僅存  
秦漢印三十  
九東坡居  
士牙印一身已似葉浮海。萬物何殊花在鏡。誦君旅游求古  
篇。增我倉皇去鄉恨。萬事都已夫何言。餘生泡影他邊問。

平湖朱禮卿觀察王林嘉慶辛未會元著有小雲廬詩稿刪存  
五卷。古體雅健近體尤善。于言情如廣陵懷古二首云。弭櫂雷  
塘弔阿麋。烟花南部竟如何。曾聞鐵騎喧朱雀。旋見飛書下木  
鵝。廿四橋頭懸夜月。三千殿脚葬宮娥。玉鉤斜畔銷魂地。春色

年年長綠莎。錦帆無復下龍舟。嗚咽邗溝水自流。垂柳祇今  
憐。板渚寒烟何處認。迷樓雞臺未醒春。風夢螢苑還歌。清夜游  
三十六封書。一笑江城空鎖暮雲愁。二詩金荃遺韻哀絕倫。  
黔州七夕云。蛛網塵生掩綺樓。歸期孰唱大刀頭。歌殘錦瑟華  
年恨。腸斷銀河絳角秋。天上有情猶惜別人閒。無地可埋愁。青  
鸞白鳳參差翼。萬里含悽對女牛。此悼亡之作。黯然銷魂。題邊  
袖石先生詩集云。金荃風調玉谿詞。綺歲聲華日下馳。落筆難  
銷才子氣。讀書要與古人期。愁生梁苑烟燕夕。夢遠漳河月上  
時。莫爲旅游鬱奇抱。興桐終遇賞音知。落筆一聯詞。寓諷勸頗  
得古人贈言之旨。

儀徵汪蕤卿太史廷儒有秦淮雜詩云。觀象臺高半菱烟。功臣  
十廟總淒然。兒童那管興亡事。爭上臺城放紙鳶。風暖紅梅度

曲遲澄心堂紙寫新詞。可憐多少銷金格。送盡江南一釣絲。二詩有新意。不拾漁洋唾餘。

詠關塞等作。必須親歷其境。方有氣岸。如貴月山大司農慶詠。山海關云。吏報關開馬亦驚。連連睥睨與雲平。羣山尙作窺邊勢。大海難銷出塞聲。李勣謬稱唐保障。蒙恬眞爲漢經營。試看何代如今日。二百年來一洗兵。

善化孫芝房侍讀鼎臣。留心經濟著芻論。一書意主變法。大抵襲亭林之說。爲多曾文正。胡文忠二公序之多。不滿語。然其論言官之盛衰。屈伸推究。人情實能發前人所未發。所作詩亦多關係時事。夜雨銅溝舟次云。楓葉深紅竹淚斑。暮天南去水潺湲。鄉心楚雨聞猿夜。歸路河冰倒馬關。刀尺寒催兒女瘦。田園老羨弟兄還。皇華自古懷將母。況復羈愁過百蠻。此使黔時作。

百感蒼茫言不盡意

滇南詩人道光朝有五華五子之名五子者李明經卽園戴上舍古村楊司馬丹山池宮贊齋庭及戴給諫筠帆也筠帆名綱孫著有味雪齋詩鈔歸田後主講五華書院余于咸豐丁巳春在院一晤容止簡淡如野鶴雛雛詩工研鍊晚年稍染指于長吉義山佳句如石瘦虬龍古山空虎豹尊烟光橫大陸雲氣接中條浮雲衣帶緩明月酒盃寬寒風支酒力舊雨絮鄉愁皆有中唐人氣格又范陽詠古云千古冤獄乃有此楊左諸賢坐贓死句法雖脫胎于亭長歸來作天子然語極沈痛

姚伯昂總憲元之一字鴈青自號竹葉亭生安徽桐城人善繪花卉分書適麗體格在乙瑛曹全間嘗奉使盛京 敕篆 高廟玉寶道光戊戌督學我浙每試士子必于堂中結臺高坐巡

捕等望風訶察專索生童小過偶聞嘻笑聲輒于廠中捽其人  
上堂跪領呵責人懷惴惴惟恐誤及向來學使按臨所發條教  
皆官簿例言公多自譏語閱者轉詫其異生平無冬夏喜露頂  
惟點名時一加冠耳不啻茗日飲冷泉按厯他郡必載虎跑泉  
以隨大抵公性孤僻諸苛細事皆吏役輩爲之然而人言嘖嘖  
矣著使藩集入山海關云日氣香朝海霜華明遠山迎將去年  
客來度早時關楊柳皆春色雲霞改凍顏門前兩行吏笑我使  
車還

水旱偏災何地蔑有然報災限以程期遲則格于例而不能行  
在朝廷立法原以杜貪吏之欺蒙而通變救民權在大吏荆  
溪周芷菴濟有詩云民難自裕三年蓄天豈能爲合例災有慨  
乎其言之也



阿芙蓉之毒遍流海內嗜痴者謂可補益精神而不知膏火之  
自煎也嘉應李閤如光照有阿芙蓉歌云長生無術乞神仙速  
死有方求鬼國收云神仙杳杳隔仙山鬼影幢幢來破宅故鬼  
常攜新鬼行後車不監前車迹長歌代哭不知能發人猛省否  
近則烟館盛行街頭巷尾鱗次相依皆布帘垂門木牀倚壁喫  
吸之聲達于戶外有人集句爲聯戲贈云重簾不捲留香久短  
笛無腔信口吹可云工極

湘陰李石湖制軍星沅乙未進士由翰林官至宮少保兩江總  
督有集八卷交河曉發云天連大漠沈刁斗地入平沙散橐駝  
樹杪明星寒不落馬頭殘月照無多頗有風骨少時讀書與善  
化勞辛階制軍崇光最契嘗贈以詩云後日功名當一例天風  
竝馬上金臺厥後二公均以詞林起家數歷中外迭任封圻李

之經略廣西卒于營勞以總制雲貴督辦回務卒于任盡瘁鞠躬齋志而歿李諡文恭勞諡文毅其先後出處略同而于未達時豫操左券洵乎文章有神交有道白首同歸非虛語也

楊子萱大令炳江西新城人令吾邑最久後升乍防廳有惜味軒詩四卷春草詞云一碧芊眠夜雨滋春愁無賴酒家旗那堪望斷瀛洲路惆悵東風未綠時曳杖尋春向晚邨隔年野燒尙留痕一經好雨多生意不受園丁灌漑恩二詩皆有寄託前首傷起家不由甲乙科次首則以強項自命也

咸豐乙卯丙辰閒全椒薛慰農同年時雨來宰吾邑以儒術飾吏治循聲載途公餘接引士類不倦邑人士于其去也咸賦詩以贈彙刻成帙大抵頌禱之詞居多余獨愛秦次游孝廉光第六言絕句四章詞拙意工最爲實錄能吏到處皆是誰令民氣

回春我侯別無表見但能學道人其兵火相望不遠災荒更待扶持正是好官世界莫云生不逢時其境內方歌來暮驪駒忽繫門前陽城自署下考豈能多留數年其程門紛紛祖道投詩燦若卿雲別有鄉村父老歎息不能成文其四其次游本淮海後裔占籍秀水長爪瘦軀有鶴立雞羣之概幼擅夙慧精書法工詩古文詞終年橐筆遠游後以佐幕功保舉郡丞未出山而沒著作經亂星散殆盡蓋其才似黃仲則一流人而運蹇過之今育嬰堂中尙懸其手製楹聯云保全幾箇嬰孩大眾用些心尙恐半生半死權作他人父母老天終有眼管教多子多孫古今詠水仙花推山谷一首爲絕唱近見秦次游司馬雨律亦臻超詣幾日晴光到畫屏翠衣齊解玉瓏璫洛川更奏陳思賦上界應逃女史星微步何來塵漠漠橫琴相憶水冥冥夜深燒

燭重簾下彷彿明璫見眾靈其一生小盈盈愛道粧不堪洄溯斷  
人腸低頭只其梅花笑照影可憐春水長初日鏡奩呼欲活早  
寒池閣夢俱香坐愁天上東風緊一夕淩波去渺茫不脫不粘  
足爲斯花寫照孫次公明經融和作云東風池苑晝悄悄沐霽  
濡裝弱不禁始信天人無粉飾劇憐小草有冰心移來湘浦誰  
留佩開到山齋客抱琴儼其寒泉薦芳潔西湖祠畔未春深亦  
復異曲同工

同里沈丈慕琴直刺亭惠從弟晉仙之外舅也道光庚子舉人  
由教習期滿出宰粵東未捧檄前屢困公車逡遲日下性情豪  
邁喜交游其抑塞磊落之概時寄之于詩嘗隨朱穎艘觀察幕  
游羊城有登西洋鬼子樓長篇以詩代繪如出鬼工詩曰危樓  
傑閣高切雲螭牆粉白橫雕甍鉤闌高下塗淨綠銅樞銜門屈

戊平踏梯登樓豁望眼網戶宏做涵虛明複帳高捲紅韎躡流  
蘇斗大懸朱纓華燈四照銅盤膩虬枝蜷曲蛻膏盛丈餘大鏡  
嵌四壁舉頭笑容來相迎瑊瑳市地釘帖妥天吳紫鳳交縱橫  
佞盧小字媿眯目蛛絲蠶尾紛殊形鵝毛管小製不律琉璃椀  
大爭晶瑩器物詭異何足數波斯市上嗟相驚白鬼婆娑黑鬼  
躍猿啼雀步來零丁晴圓鼻突蜷毛髮短衣密釦燦繁星窮袴  
連纏貫髀股皮鞞結帶狀殊獠魑魅形應叱叔夜撈犁語更窮  
士衡見人逡巡掉頭去手一短筇雙目瞠我皇德威遍四海  
宇內久息潢池兵西域三十有六國通商惠工除苛征他族逼  
處究非策奸宄須防芽蘗萌罔利爭悅吐金烏掉尾豈乏橫海  
鯨撫綏安輯賴大吏澁渤終古昭澄溝作此詩時西夷尙未攜  
尊篇末云云思患預防綽有遠見又有秋感詩八首則正詠西

夷構兵事也其二云泰山一死正須爭卻笑投淵表至誠我法  
不如卿法善清流翻借濁流生本爲撒手懸崖計更作拖泥帶  
水行卻憶梅岑孤島上猶傳毅魄殉危城按夷酋陷定海知縣  
姚公懷祥死之太守舒某素負重名戰敗投水以救免故云其  
三云授鉞專征擁節旄雁翎騎士憂弓刀金吾上將誇龍種玉  
帳參軍是馬曹環甲忽驚妖霧集投戈遙指陣雲高最憐風鶴  
纔聞警也惹兒童唱董逃此首刺奕經略其六云白徒團練本  
虛名了烏衣裳獺尾纓棄甲回城何雜遝跳刀入市獨縱橫豈  
真跋扈王夔卒更甚搜牢董卓兵寄語當官除害馬亟銷鋒鐔  
勸歸耕此首指乍川失守觀察宋某所統東勇潰回郡城肆擾  
事其八云江南鼙鼓又交鳴橫海偏來掉尾鯨歷亂烽烟明滬  
濱倉皇壁壘築茸城樓臺已盡金銀氣冠蓋同驚草木兵獨惜

死綏楊大眼模糊碧血灑滄瀛此首紀上海失陷陳軍門化成  
殉節事

德清俞蔭甫太史樾道光甲辰鄉試闈藝傳誦士林工四六及  
詩詞庚戌釋褐後回翔史館視學中州既罷歸潛心纂述升沈  
之感略不繫懷所著羣經諸子平議兩書熟于訓詁聲音之說  
多以經證經破其假借之字務獲真詮其學足繼三惠二王之  
後他所著錄甚富皆手自付梓風行海內宜其足于內者無慕  
乎外也春在堂詩編六卷稱心而談不事規仿深合比興之旨  
有云平生學齊物顛倒任化工化我以為鳥吾因巢于叢化我  
以為魚吾因游于江必存今昔見無乃猶兒童通懷達化得于  
莊列為多慰周雲笈下第歸七古一篇筆力之瘦硬韻脚之工  
穩大類涪翁今春送子游京華缺斨之衣深雍韉燄光二丈在

頭上愁君燒殺長安花春風吹夢夢忽醒蹇驢席帽仍還家手  
握蛇珠世不識子無一語旁人嗟男兒自有不朽事勿與眾婦  
同嘔啞纓冠束帶學拜跪如鳳在笄麟在罍口作箏聲不成語  
我視其頰頰于戲世間名利豈不好一骨投地萬大酹不如歸  
埽子斗室左右圖史如排衙佗人入室詫不識但見東東鰕紅  
牙君坐其中細咀嚼勝辟穀食餐晨飯不然春秋選佳日于山  
之麓溪之涯沿溪釣月一竿簪入山采雲雙韉鞞道逢熱客試  
問訊何若款段紅塵撾歸來婦有一斗酒其肴惟何魚鼈鮓上  
堂問母母曰誓兒女繞膝來呼爹君于此時樂不樂有如癢得  
麻姑爬鄙人十夜九此夢所苦有願囊無錢獨坐千山萬山裏  
不覺心緒紛如麻安得一棧兩棧地去與鄰父同耕耨他年有  
田不歸隱請卽此歌盟以猷近體如謁岳忠武廟云南渡君臣



生氣少。東牕夫婦殺機多。蒼頡墓云不識何嘗非快活。好奇未免太聰明。經書燒後無真本。字母傳來半梵聲。皆傳快可喜。姚平泉廣文光晉初名琨。字仲瑜。又名慶實。仁和臨平鎮人。蔭甫太史之舅氏也。續學工文。道光乙酉舉于鄉。年已四十有六。入都留別詩云。二月輕寒餘馬背。十年老女蠶蛾眉。縱教好夢來容易。如此尋春去已遲。八應禮部試不售。以國史館膳錄議敘。得知縣。改就教諭。抵上虞任云。人方解組。我彈冠。七十年華興未闕。讀之可破涕爲笑。詠雞冠花云。枝高何異鶴頭丹。種到階前伴芍欄。曉色當牕猶不報。笑卿空戴惠文冠。此刺言官之效寒蟬者。公旣三易名。嘗有句云。避劫求仙效伯陽。蓋伯陽嘗三易名以避劫。其用典確切如是。

萍鄉文樹臣觀察之祖融谷明經。讀先信國公集云。工部詩篇。

朱子學武侯心事。岳家軍比例精切。千古定評。又有句云。尋春遠記來時路。得趣長吟。改後詩尤見雅人深致。觀察有宿遷道中云。荒雞聲不斷。曉發大河西。日淡疎人語。霜清健馬蹄。湖雲連岸白。邨樹入天低。百戰淮徐地。蟲沙迹已迷。

昆明王矩卿侍郎琮。至性過人。事繼母極孝。道光戊申。以少司馬乞養旋里。太夫人性嚴。公旦夕侍食。惟謹。能得其懽心。咸豐末。髮匪蔓延。詔各直省在籍紳士咸練兵。自衛鄉里。公被同人牽率。用紫粉關防。與地方官會銜。出示爲督撫糾參。褫職旋卽。奏復公坦然不介于懷。太夫人棄養後。布衣蔬食。出不乘輿。同治癸亥。省垣回匪之變。戕官劫民。公不受逼迫。自縊死。妾某從焉。公爲湘鄉相國師門。相國獎孝表忠。不遺餘力。獨于公未經闢揚。豈有志而未逮耶。著知蔬味齋詩鈔。余昔有其書。今

亡矣猶記蜀游艸中畫角一首云畫角鳴鳴我馬行復驚僕  
夫前告我山後猶屯兵屯兵何所事防夷兼衛氓往者夷出巢  
劫掠患尙輕縛之見長官意當處極刑念其犬馬性或可代餘  
生奈何務弭事姑息違人情羈布不論匹濁酒盛滿罍殺人猶  
厚賞安得不橫行君看富林營路無雞犬聲感喟時事格近少  
陵又某科考試差未膺簡放有句云貧家無分栽桃李獨向  
東風賞落花比王禹偁三入承明不知舉看人榜下放門生更  
蘊藉

潘忠毅公諱鐸字木君江甯人道光壬辰進士以庶常改官部  
曹歷仕至河南巡撫其備藩星沙也值粵匪圍攻省垣甚急公  
銜命至繼而入甫卸裝卽督同文武嚴密捍禦嘗雨夜周巡  
路滑馬蹶幾折臂公奮不顧身扶創拊循士氣百倍雖屢瀕于

危而城卒保全楚人至今感之及再出總制滇黔是時滇城撫局已成綠營要地皆回人據之東南軍務孔亟朝廷兵力未能遠及夜郎公奉兩宮諭旨諄諄以息事安人爲務于是

單車赴任思惟開誠布公勉支危局患將并驕悍無制日于演武場校閱兼以習儀業相安矣有逆回馬榮者署武定營參將陰納款于大理賊渠杜文秀以往援臨安爲辭帶兵突入省垣盤踞五華書院顯露叛形滇民大恐公反覆開導折以大義始允以某日啟行至期無行意公親詣書院促之馬榮出見語不遜公叱之突遇害監院學師華嶸見公死推案大罵亦被戕武巡捕鄭某聞變趨視撫公尸大慟被賊斫死于旁雲南守黃培林昆明令翟某同死之事聞賜諡忠毅昆明孝廉孫菊人清士時爲諸生以詩弔之有云此虜終然攘臂起老臣原是戴頭

來是真知公心者也。公性恬退及慷慨任事則置死生于度外。憶咸豐乙卯公因事去官留都下作書懷云天垂優詔許閒身。來作長安索米人。又云解說性情惟骨肉得安衾枕卽巖阿。蓋有徜徉終老志不知天特欲顯公之英風毅骨以終滇南十餘年來浩劫固未許以菟裘易馬革也。

江都蔣叔起觀察超伯有唐花詩結云僅供屏几玩倏見凋零悲少忍須臾寒豈無春風吹此爲趨炎躁進者下鍼砭。

柏靜濤協揆有值班紀事詩云幾度暄和幾度涼亂山高下又斜陽我如開寶閒鸚鵡日向峯頭哭。上皇此當是送宣廟。

梓宮奉安陵寢時作也。

滇南何曆卿少司農彤雲與余鄉舉齊年道光乙巳入翰林以盛年受九重知遇倅直內廷由史官驟躋卿貳咸豐丙辰

冬奉諱出都值滇寇道梗流寓蜀中旋以己未元旦卒蜀僧雪

堂梓其遺稿爲麋縵堂詩四卷又矢音集一卷則應制之作

其詩以清麗爲宗無臺閣習氣嘗和御製昆明池曉泛韻一

聯云未雨得微陰眾妬富清曉乙卯元旦早朝大和殿云絳

幘三呼夜向晨華鐘初動仗齊陳又驚闕下逢新歲漸覺班中

少故人金匱函章元老進交闈紫幣遠臣賓時朝鮮琉球同入貢去年今

日猶堪憶雪晃朝衣映紫宸其御爐烟裏靜鞭聲縹緲仙音響

鳳笙憶昔常依香案近祇今近覩衰衣明禁廷久愧稱供奉海

國初驚問姓名朝鮮使者班末朝罷未隨諸老退簪毫依舊

內中行其此真盛世元音熙朝佳話然君雖恂恂儒雅而秉性

剛方集中有詠史云早歲旌旗海上雄曾將事業詡和戎已聞

衅起蕭牆內忽訝灰然園土中臨死始呼賁國賊餘生猶望富

家翁屬鏤不使汚奸血漫道教全首領終此爲刺某通侯而作疾惡如仇聲情並厲窺其志豈僅以文章報國者天奪之年不竟其用惜哉

雲南曲靖府所屬陸涼州道中有名和睦寨者爲夷人峭地地勢曠衍湧出奇石磊砢嵯峨自成段落高者十餘丈矮者丈餘彌望成林疎密有致如覩倪迂窠石竹木圖約十里乃止同治甲子春余由滇赴黔策馬過此緩轡縱覽竊歎以斯境界移置大江南北得荆關董巨輩物色及之當詫爲宇宙閒奇觀豈止若師子林之局于咫尺哉乃韜匿荒徼志乘缺如意者山靈深自珍秘如浙之鴈宕近在目前必遲之久而後洩歎近惟廣縵堂集中題爲石林偶詠及之一望忽森森蒼然石氣深插天青玉笏墮地碧瑤簪長訝鐔千尺低猶笋一尋不逢元鎮畫師子

獨名林

元和陳梁叔克家工詩爲姚石甫春木兩公所激賞嘗夜坐聞  
牆外哭聲甚哀得句云一寂捐諫病千哀起道心取徑幽雋不  
蹈故常

江甯姚實菴先生錫華陳臬滇中工詩惜未獲讀其全稿僅憶  
斷句如宿驛店云避蚊先覓帳照蠅屢呼燈放榜前一日云朋  
儕漸訂偕歸約親串猶投例賀書情景皆真

青浦何古心其超家住簞山世以儒醫顯工詩嘗問業于姚春  
木先生其詩以清瘦澹遠爲宗著藏齋詩鈔六卷近體如五言  
云蘋花五湖水松色六朝山落梅春徑雪燒笋晚廚烟露檻花  
同韻風枝鳥各聲雨收千蛤吠風定一螢來苦雨云山禽春咒  
木水魅夜呼人避亂過泗涇云到門秋落木上市畫逢人七言



云蘆灘沙暖。蜉蝣出。稻鰭風清。蚱蜢飛。梅花落盡。初飛燕。春水生時。正上魚吐。屬頗近楊孟載。

貝子木青喬吳縣廩生有半行菴集八卷與長洲江昉叔齊名而坎坷亦同何古心謂江詩隋削森危岑貝詩琢玉還鏘金故爲區別其實同一杼軸而貝更峭厲議論喜透過一層詠燕云海燕歸來亦斷魂雕梁埽盡古巢痕人間祇重金環報莫恃當年舊主恩此刺利交之輩也熟梅云止渴其如眾望何此中酸味已無多有人重索梅花笑用作調羹祇解和此有感泰西事而諷時宰之持和議也舟泊漢陽云掘盡枯荻成赤土游人還說踏青來糠粥謠云隔牆望見突烟起眼熱猶有鄰兒窺皆用加倍寫法又嘉興道中一詩紀禾地遭寇之慘他人讀之猶當酸鼻矧阿儂哉託益餘生破壘邊積骸成莽陣雲連閱躬有是

諸艱備慘目無如此地偏四野孤餐呻冷月一城殘鬼哭荒烟  
前游記值春燈節聒耳笙歌擾夜眠

詩貴立言得體徒作不平之嗚呼冤道屈非溫柔敦厚之教也  
昔林文忠公遣戍西口道出金閶本公舊治門下士貝子木獻  
以詩今節錄之公昔撫吳日歲歉多創痍開誠乳赤子悉隱籲  
彤墀坐我衽與席起我溺與飢實心非異政錢入民肝脾至  
今諸父老述之猶涕洟昨日聞公至渾舍爭來窺挽船塞河汴  
攀轅擁路歧遮留三晝夜罔顧官限遲喜公春滿面惜公霜滿  
髭謂公鎮南服上契天心知島烟流大毒一炬良所宜何爲  
望吏議褫職投邊陲顓蒙昧無識未免生然疑我欲告以故亦  
復拙言辭惟云君子過日月有盈虧圓魄施夜彩蝦蟇朶其頤  
麒麟地上鬬靈曜有食之仰欲得其象四海皆嗟咨安用戍車

側眾口。憤所私。收云行矣。貞所德。昌辰以爲期。此詩忠厚蘊藉。義符古人矣。

咸豐丁巳。粵東省垣之變。藩籬自撤。葉帥西行。貝子木紀聞詩。所謂羣鬼陰謀。原鵠突相公大事。太糊塗是也。錢塘徐子遠常博。灝時在粵省。感事抒懷。作漫興八首。激昂慷慨。直接遺山。今錄二首。使相功成。自不羣。誤教匡坐待殊勲。六王元女言終驗。五夜青詞秘不聞。鬼卒肯隨王內史。匈奴真縛李將軍。悲來應共冤魂語。萬丈風濤盪海雲。羽觴高坐會神仙。轉眼山川景物遷。鎮海樓前朝戲馬。呼鑾道側夜啼鵝。樊中馴服非前日。楊畔酣眠近百年。滄海卽今成捷徑。麻姑何必見桑田。常博所著有通介堂經說札記說文箋疏靈洲山人詩文集。

番禺梁儷裳先生國琮以道光丁酉拔貢中本科鄉試解元戊

戊會試聯捷入詞林子甲辰會試薦卷房師也其胞兄國瑚已  
亥舉人辛丑進士改庶吉士科第皆後于先生封翁薈甫先生  
有聞大兒館選詩云何妨讓弟稱前輩已校儒官上數尋註前  
署澄海教諭故云一時傳爲佳話

近世言詩家大抵喜工麗者學玉溪豪放者學玉局若夫原  
本六義上準風騷則古調莫彈斯道如線近讀杭州譚仲修孝  
廉獻詩可謂大雅復陳矣復堂詩集中五古最佳美不勝採茲  
錄哀詩一首詠今事而頗合古樂府其詞曰 宣宗皇帝末年  
浙江巡撫吳公下車擊豪強僚吏趨風解一月離于畢厥歲天淫  
雨大水日夜禱祠行泣于野上告 天子蠲宿逋復田租出生  
于死解二公性慈仁用法嚴平敷歷中外罔不翕然稱賢解三厥後  
三年廣西寇起窺漢與江 新天子詔曰爾吳文鎔可持節督

南北諸軍事。朕開明堂待成功。

四

謨謨文吏專已私。

五

沈沈武

臣持爵祿以嬉。

人言嚼啗盈廷首。

鼠莫決公心。

憂悲

五

兩陣交

解

大旗飄飄獨前斬。

敵無算。軍聲動天親犯矢石奄忽不幸歸黃

泉。

六

事聞舉朝震悼。贈太子太保諡文節。楚人至今以思。豈徒

公之悲。又六年。舊部民杭州譚獻賦詩哀之。

七

遮窮諱苦亦徒然。欲訴還休更可憐。昨夜舉家聊啜粥。今朝過

解

午未炊烟。強顏且去賒升米。默計都無值一錢。誰信先生誰不

信。禦寒無被已三年。此沈四山人自述貧況詩也。山人名謹。學

字詩華。又字秋卿。元和農家子。耽吟詠。不善治產。以貧死。友人

爲梓其詩六卷。取徑幽雋。避俗如仇。與吳江郭丹叔山。簪書屋

詩相近。頻夢見亡妹云。青黃變柳。變年華。回首東風事太差。久

不歸甯同死耳。頻來人夢尙生耶。淚痕認母時。乾溼病勢憐余

不歸甯同死耳。頻來人夢尙生耶。淚痕認母時。乾溼病勢憐余

不歸甯同死耳。頻來人夢尙生耶。淚痕認母時。乾溼病勢憐余

不歸甯同死耳。頻來人夢尙生耶。淚痕認母時。乾溼病勢憐余

不歸甯同死耳。頻來人夢尙生耶。淚痕認母時。乾溼病勢憐余

不歸甯同死耳。頻來人夢尙生耶。淚痕認母時。乾溼病勢憐余

不歸甯同死耳。頻來人夢尙生耶。淚痕認母時。乾溼病勢憐余

不歸甯同死耳。頻來人夢尙生耶。淚痕認母時。乾溼病勢憐余

屢減加歎息。不如聞草木。當年姊妹又開花。竹枝歌云春夜迢  
迢。眞可憐。竹籬色壓柳如烟。東家織布西家睡。月子彎彎上  
天。又如水潑一階月。潮奔萬樹風。此時短檐底。如落大江中。夕  
陽吝餘光。愁人惜春色。蟻背馱花鬢。蒼苔尋縫入。青春爲樂短。  
白日忍飢長。秋柳云涼露滴乾。青眼淚暮蟬。悽斷白頭吟。皆寒  
瘦本色語。

小匏菴詩話卷十

嘉興吳仰賢牧騶輯

善化許雪門觀察瑤光由道光己酉拔貢朝考一等出宰浙江同治甲子來守我郡承髮匪蹂躪之後紀綱蕩然公寓寬於猛法立惠行殘黎賴以安戢闔郡愛戴歷久無異詞其詠懷詩云縱隨民欲差浮譽除摘奸頑少重刑蓋紀實也光緒初元在郡梓其集爲雪門詩草不乞名公鉅卿作弁首文其不慕浮譽與居官同詩境雄厚不屑以雕琢見長古體多關係時事其自抒見解處尤妙於設譬不必學蘇而深得蘇詩三昧如吊江忠烈云夷材強之將長坂驅耕牛將材強之吏伏轅絆驂騶又云飛棋著死腹無復望回頭時有鄉民私集義勇意在投營羣疑不軌因而罹法作飛螢怨云飛螢不自量深夜欲助明月光主

人懷疑。認狐火。草際可憐將。汝傷浙西從軍行云。雕鶚伴鴛鴦。  
那復雲霄想。蓋諷將弁之耽聲伎也。集中此類甚多。近體不拘  
一格。其癸丑除夕到家寫悲二首云。故國幾無國。殘年不當年。  
卑官違白髮。佳節隔黃泉。隴草冰霜斷。粉榆劫火鮮。屠蘇是何  
物。一奠淚漣漣。生兒生季子。兒長已親類。婚配焦勞具。詩書遠  
宦媒。么雛彌撫愛。晚稻竟虛栽。痛絕春風返。護花不復開。情真  
語摯。上繼蓼莪公。政事之暇。閒脩觴詠。南湖烟雨樓故址。僅存  
瓦礫。經營數載。亭榭花木。漸復舊觀。公有句云。補種荷花延白  
鷺。豫栽楊柳待黃鶯。又繪南湖八景圖。題詠刊石。文采風流。遠  
近傳爲勝事。三風太守不得專美於前矣。

侯官郭遠堂中丞柏蔭詩。寫性靈。饒有寄託。如以狐裘質米。感  
而有作云。一領蒙戎在。如何稱冷官。更無留汝法。轉憶得來難。



暈酒痕猶漬題襟字未乾相思應有日十月朔風寒癸卯出瀧  
維詩云風骨天生一世驕那因瓠落說無聊寶刀屈作青銅鏡  
只有光芒不肯銷殆所謂磊落而光明者耶

余同年商邱陳熙堂大令景雍官湖北通山縣知縣勦賊陣亡  
著有春影樓詩稿喜叙秋至云翩然一笑各驚猜執手匆匆倦  
眼開不信尙能愁裏活相看俱是賊中來江湖何地容孤傲雨  
雪殘年賦七哀生死休論明日事對揮熱淚且銜杯一氣旋折  
脫口如生此詩家至詣也

平湖何松蹊大令慶熙道光丁酉拔貢官直隸知縣著有紅  
吟館詩鈔四卷於清華朗潤中饒倜儻之致懷方丈鍊珊云垂  
老方三拜春來多病身大文河氣勢薄俸鶴精神瓶鉢如依佛  
圖書足養真行囊賸詩句應惜我長貧且園贈林梅隱云鴻天

環碧水人坐水中。中央馴鶴亦高致。老梅多古香。不知有魏晉。相與話。裴王呼出孤山月。陶然足醉鄉。

都中詞曹諸官往年作銷寒會。戲舉一大事。一小物爲題。要成七言律句。一聯以觀其裁對配合之巧。如一以試行海運爲大題。而以簪爲小題。何子縵形雲得句云。轉輸乍可舒民力。長策終須借爾籌。一以天下地理圖爲大題。而以黎爲小題。金翰皋鶴清得句云。尺幅星躔環樂國。一盤風味薦哀家。二聯俱徵巧思。諳此法者。作試帖詩。蔑不工矣。

都中值鄉會。兩試放榜。以前諸同人相約酣飲酒樓。不攜杖頭錢。座中有獲鶻者。卽推爲東道主。而取償焉。謂之吃夢。又必舉一局外者爲酒監。呼曰夢神。夢神無解囊慮。咸樂爲之。然一座俱落。孫山外則眾各分攤。雖夢神不得免焉。余嘗戲吟三絕。以

紀其事逐鹿隍中手斫之樓頭行炙客傳卮雞蟲得失須臾事  
好趁黃梁未熟時莫羨監筵作夢神夢神也是夢中身黑甜鄉  
潤誰能管幾箇曹騰忽嚮晨十千一擲酒連償得意春風馬上  
郎剛道酒醒身出夢不知前路夢方長

吾邑祝明揚萬壽梅里人武諸生工詩畫阮文達公督學兩浙  
時明揚以武生試古學冠其曹題爲豆棚賦原作刻入試牘起  
聯云一望參差花垂數枝二句已攝取全神并刻其銀河篇七  
古一首明揚武藝尤絕倫矢無虛發復精張三丰內家法徒手  
足敵百人顧屢黜於選武場會文達撫浙主試武闈蓄意拔之  
方校步射五發皆遺勝貽失色公顧謂曰今日風橫甚非汝藝  
劣賜矢命復射矢鵠如初遂趨而出他日公呼明揚謂之曰文  
章憎命汝以兼人才自累毋再應試爲也命投効轅下時值承

平無用武地。抑鬱而終化。城庵內古壁。畫梅是其手筆。近燬於兵燹矣。詩稿不傳。

維縣郭靖侯大令綬之詩。得燕趙氣。滄江集中有爲王笈甫別駕咏袁臺瓦硯絕句三章。感時寄興。慨當以慷。片瓦摩挲。訪舊塵莫臺荒後。鄴臺春陶泓獨抱興亡恨。不與陳王賦。感甄沮授田豐自一時。黃星官渡事。堪悲霸圖瓦。解英雄散千載。陳琳草檄詞。拋殘鏃。硯事金戈我亦臨。風感慨多寄語秦川貴公子。袁曹舊恨滿黃河。其他七言尤多佳句。寄蒯蒯畦云。將子能來飲春酒。約僮且去烹鯉魚。德州送汪鏡初云。花飛厭次空春色。人渡鉤盤正暮潮。天津繫纜有感云。同學諸公有臺省。故山歸夢滿烟蘿。送肅毅伯振旅還都。拜協揆之命云。殿中劔履迎蕭相。道左囊韉待晉公。無題云。唐代租庸闕。宰相漢家刀。筆半公卿。

皆開拓有氣勢

江都錢子奇國珍余癸卯同年也官浙江縣尹著有峯青閣詩鈔題小默和尚照云小默默不語枯坐契至理何處悟禪機空山落松子極澹遠又有句云無定河流天上落太行山色馬頭看青蠅百尺截秋雨白鳥一雙翻夕陽卻又雄健

蒙古柏東專觀察募員材略喜談兵如陳同甫一流人少從聶蓉峯太史游釋褐後以兵部司員隨大營轉戰甚久著有鐵笛仙館宦游草及先後從戎草詩皆沈雄其呈恩緘葺尙書十首指陳軍事實有作用非紙上空談首云將才本天授生爲梁棟資次亦歷兵間深識行陣機苟未歷鋒鏑烏能工指麾識途有老馬卒伍皆可師古今兵家言方策猶昭垂絕學非師承抵掌承平時父書縱能讀勿爲趙母悲又云徵兵數逾萬一家萃胡

越勢既等烏合。搏沙終坼裂。古人推腹心。情誼敷愷切。嗜好喜  
忌殊。才能羸縮別。仁義卽法律。淪浹在膚髮。齊然爲我用。赴蹈  
亦愉悅。又云見賊譚相走失律。則有誅。豈不畏軍政強懦同一  
途。戰罷按功罪。黑白互欺誣。桃僵或李代。攻瑕且掩瑜。計非屬  
選鋒。疇其奮前驅。豈無翹關材。英風冠萬夫。徒木信能示。食駁  
報可圖。盤根畏利器。况乃摧朽株。又云行軍用偵諜。樸與黠相  
濟。瀉篤情不欺。僥巧機無滯。虜在吾目前。明鏡絕塵翳。亦如血  
脈流百骸。豈頑痺。尙教擇未精。薰蕕任同器。訛言亂神明。疑信  
迭牽制。將如狐聽冰。何以決大計。又咏老馬云。此馬非凡馬。隨  
余忽至今。相看俱暮齒。百戰有雄心。路遠弓刀重。秋高菟藿深。  
何人求駿骨。未肯惜千金。老驥伏櫪。自寫壯心音。節直逼老杜。  
武進潘麗亭清撰。以孝廉出宰我浙。因墨悞去。著有挹翠樓詩。

鈔又詩話四卷如竹外一聲磬人來十里庵埽徑幽人至開門  
孤鶴還春從愁裡盡詩是客中多倦來惟假榻客到始開門七  
言如半牕日影檣搖上一路風聲竹引來一春門靜常關雨三  
月風寒未脫綿讀書生有條來福作宦人誰去後思皆清麗可  
誦

新會黃東耘大令仲奮少負不羈才好遠游常浮海歷閩浙直  
抵普陀而返僑寓滬上就升斗祿捧檄入都受知於燕山桂相  
國延爲上賓因相國謁恭邸咸豐庚申八月之役橐筆以從委  
曲蒞事明年和議成敘功得知縣改官畿南畿南其先世宦游  
地也因撰聯語鐫爲印章曰十年京國趨戎幕三世畿南作宰  
官紀其實也著有心字香館詩鈔十卷卷自爲集而各弁以自  
製駢體文組織工麗集中如讀張船山詩云性耽無病藥愛說

有錢貧內子。載圖書。攜男女。由粵抵滬。云四日五千里。飄然九死身。波濤成畏友。風雨慰勞人。出山云吏原不俗。聊栽竹。官豈能閒。且讀書。鏡中華髮銷。豪氣世上黃金役。淺人書感云。客子情懷如野鶴。春郊風味上河魚。皆俊句也。

張船山燕知官。令將遷壘。犬信家貧。不吠人。寫貧狀甚趣。仁和車少芸明經伯雅。質衣有皺蟻生。褶投骨無聲。犬就憐則更甚矣。憶陸魯望有句云。嬾外應無敵。貧中直是王。貧亦稱王。足令餓夫氣壯。

太白作蜀道難以諷章仇兼瓊。陸賈作蜀道易以諛韋皋。此皆借題寄意。非真辨度棧之難易也。我朝經賈膠侯尙書伐石開道。棧路愈平。宋荔裳作蜀道平以美之。嗣後踵有修治蜀中好義者。常傭匠在山。擇有頽壞者。不時補葺。山腰陡隘處。下臨



深壑則旁磔短垣以護之卽有失足無虞墜淵故行者以爲便  
咸豐丙辰余初入蜀胸中先橫着太白一詩不免稟稟及肩輿  
登陟了無畏途乃作詩曰昔讀蜀道歌歎息卷爲掩峻極愁登  
天猿猱跡亦歛賤子西南征入蜀自關陝棧路有高低妥帖皆  
如簞古人言豈誣致此良由漸更歷時代多開鑿憑氣燄山路  
鑿愈平世路鑿愈險方寸伏邛峽勿哂盧杞臉

白香山詩云賓客歡娛僮僕飽始知官職爲他人言下慨然  
此老遭逢鼎盛福澤過人故所云乃爾余宦滇南日在憂患之  
中薪水不給警報時聞嘗戲改白句云賓客憂愁僮僕餓始知  
官職累他人以示同僚莫不浩歎

白樂天贈康叟詩云再三憐汝非他意天寶遺民見漸稀康年  
只八十耳同治己巳余遷居魏塘有胥山邨農蔣叟來見年九

十一矣。無龍鍾態。能談乾隆時田家景象。皆所目擊者。相與嘆今日風俗之偷。戶口之貧而已。余曰。殆昔人勤而今人惰歟。曰。非也。昔者力田之家。按畝可獲米六斛。歲率爲常。無加勤也。今邨中上農夫。其作苦倍昔人。糞多而力勤者。計所獲不及遠甚。曰。然則地運有升降歟。曰。然。叟卒於癸酉年九十六。余嘗贈以詩云。蔣叟皤然九十齡。芒屨草服喜逢迎。脫身戎馬驚還在。把酒桑麻話此生。貞下起元今日事。田間偕隱暮年情。呼兒拋卻兔園冊。好讀農書去耦耕。

衡山陳槐庭鍾英。於同治壬申來權嘉善縣事。以所著知非齋詩鈔見示。諸作豪俊沈雄。神與古會。余尤愛其上毅勇侯曾使相詩云。宗臣戡亂答昇平。玉燭重調鏡再清。已見文章高北斗。更聞經術冠西京。黔彭盡是前驅將。管樂多爲入幕英。徧數元

戎誰得似武侯新建兩儒生較之唐人漁陽老將多迴席魯國  
諸生半在門一詩氣象高出數倍然皆實錄無溢美蓋非此詩  
不足以表侯亦非侯不克副是詩也

錢塘黃菊人刺史曾住西湖之西葺精舍爲屏隱山房庭無雜  
樹惟徧種芭蕉界以矮欄四面短牕皆蒙素紗凡與近交相裁  
答者輒翦蕉葉作方箋書以送之其下或設坐隱或置琴尊間  
爲自度腔命小鬟唱之酒襟歌袖輝映一碧時人有絕世風流  
之目其詩以清新爲主頗喜雕飾字面而性靈所奏出以自然  
鳳凰山懷古四首熟精南宋故事直逼樊榭今全錄之東京曾  
擬舊杭州玉輅依然鳳鳥留小有山河還浙臉大開樓殿壓吳  
頭九宮字應黃羅局一紙錢埋白塔愁百五十年佳氣盡西風  
零落古槐秋

其一公然龍衮癖烟霞行樂何曾惜歲華喜有鈴聲

聽鶉鴿更無更點續蝦蟇芙蓉香徹詞臣第楊柳青通貴主家  
了得西湖春一幅問安兵進躋宮花其二膳脂藻土發紅藤地下  
繁華氣尙凝戲蝶春心空畫院影魚香骨出殘陵欄干誰拾題  
詩玉山水猶傳繪事綾莫向洗粧池畔過夜深曾見鬼飄燈其三  
天水傷心一碧消炊梁夢影太飄蕭木波幽怨歸僧懺桑海遺  
魂付客招隔樹紅鴉啼欲碎過江白雁語猶驕有人邀坐梧桐  
雨同翦青鐙話七朝其四其他五言近體如苔肥秋屐靜花瘦客  
車稀濕薪遲茗熟殘蠟速詩成七言近體如半里有差僧紹宅  
數間而已玉川家啼蟲得露逢秋健瘦蝶無香似主貧矮架垂  
藤蟲絡帽小簾近樹鳥窺書夾水樓臺上燈早賣花街市泊船  
多妻孥解習他鄉語童僕諳抄作吏書笥蔬略具諳卿嗜齋奠  
無多諒我貧悼亡簪筆漸爛甘蔗帖誦詩剛到苦瓜章聽淑儀姪  
女讀書

胸多骨鯁難諧俗。腹有時宜易合人。魚鱗四絃圓腹腔。仍北一飯。  
長腰俗漸南。宿熱客心情托焦土女兒顏色似唐花。火坑上下不  
交人自冷。風波一息枕方高。冰三生金榜無羅隱。一代文章後  
陸游。藤徐青

同里徐蘭史錦年少。負美才體弱而志壯。攻制舉業。憂憂生新。  
不肯拾人牙慧。兼工駢儷。及古今體詩。中咸豐戊午科解元。著  
有靈素堂詩稿。其詩劖刻似黎二樵。豪放似王仲瞿。而纏綿淒  
麗之章。又似厲樊榭。北征以後。益趨沉着。而避寇流離。遭家不  
造。侘傺以終。深可惜也。古體多長篇。今節錄之。五古如出門云。  
雙親起送我。愁緒一時併。爲我理衣裳。戒我節吟咏。願我長平  
安。囑我密音問。蘊淚入霽色。選言多諱隱。語長容漸淒。避面乃  
一送。旅邸偶作云。忍淚竟出門。百感怒如擣。親健能持家。兒心

總愁老兒壯賦遠游親心總嫌小才短苦情長愁多恨淚少又  
云我云常思親有時尙謀醉親言不思我無書不染淚思親良  
難任思我更誰慰骨肉本多情衰病况善諱又云戒我慎眠食  
而瘁悲秋身囑我善韜秘而露驚人文每思別來狀愧汗相環  
循罄陽道中云山光不宜近刻露愁太洩護以烟樹蒼一折勝  
萬疊又云人而沐晨霏馬蹄鑄寒碧始知入山深山外固未雪  
青駝寺看梨花云看山不厭多馬疲客更勇山亦各出奇餽綠  
入妍咏沂州望蒙陰諸山云好山半不名山半湧城郭停鞭一  
回望始知山色綠韜光云西來千萬峯一峯攬其勝曠以背崖  
軒迥與飛鳥並又云活雲觸石起遠兼松陰潤萬樹浮腳底全  
吳納夢境龍門山云萬山拱一樓樓亦學山曲豁外延松光遂  
中養雲族又云閣勢絡樹背鐘聲甕雲腹天與山爭青萬樹不

敢緣讀黎簡民詩云後李杜而生先李杜而滅生我亦何爲心  
苦肝腸結又云興酣一揮灑元氣與不死驅使有百家奇崛則  
一子避亂云性情拙酬酢詩外初無長田園付兵火醉外兼無  
鄉又云年荒始習儉病多始習醫萬事落人後匪獨功名奇又  
云錢刀不入手天地與俱窄七古如鬼夜哭云仙悞一漢武桃  
落壽無幾佛悞一梁武索蜜爲短氣迂儒悞國萬萬世混沌一  
鑿人心死祖龍怒燒燒亦是借荊州云曹劉不爭無正朔孫劉  
不合不鼎足獬亭一戰斷吳蜀不報大仇報小辱答趙桐孫云  
生有科名一途縛死有吹毛萬人目書生搖筆論千秋著述徒  
煩東高閣又云男兒三十尙家食文章久矣無顏色並世不遇  
漢武皇長楊賦盡無人識費宮人刺虎歌云君死矣妾何敢生  
烽火紅入長安城不殺身眞負心賊尙生妾何敢死花燭紅照

笙歌地不殺賊亦負帝

陸次雲咏疑塚云正平只有墳三尺千古安眠鸚鵡洲徐蘭史云七十二墳衰草合更無人奠隻雞來余亦咏兩絕首云君看到死雄心盡尙占劉家土許多次云地下若逢漢獻帝也愁無窟可藏來後刻稿時以次首全涉游戲刪去今附錄於此以供笑噓

清淨法行經稱孔子爲光淨童子造天地經以孔子爲儒童菩薩西陽雜俎玉格以孔子爲元宮仙真靈位業圖以孔子爲太極上眞此皆附會三教同源乃侮聖之尤者至今釋氏大建道場猶設宣聖之疏秀邑陶生子佩名玉珂讀書勵行士也一日入精巖寺觀道場適見之憤甚退而肅衣冠疾趨寺中捧其疏出詣學官告以故焚其疏而請飭寺僧後勿復然此舉不激不



隨有關風教然不知者猶以爲多事予偶閱漢州張雨山懷溥詩有碎佛行一篇見衛道之嚴搢紳趨之亟錄之以爲當世之主持公議者助詩有序云德陽孝泉有東漢孝子姜詩孝婦龐氏祠隣寺僧利其祠田塑佛像於後殿以奪之邑人馬能脩號健齋者偕其友黃天瑞張拱貞袖鋏椎碎之其僧訴於大吏成都太守王爾鑑廉其事置僧於法卒釐祀典健齋力也詩云健齋先生眼無物俠骨錚錚不可拂低頭只拜孝子祠放膽不知西天佛西天老佛忽破戒香火直爭孝子界先生奮臂往擊之丈六金身一椎碎修羅刀仗掄不得努目金剛齊失色佛也無言僧也言三塗八難恐難釋先生曰嗤爾何知此地東漢姜公祠我朝孝治釐祀典彼無君父安得相追隨佛若有靈罪在我阿鼻地獄無可不然先教佛捨身燒取舍利投諸火城狐

社鬼失所利。織成貝錦。訴大吏。大吏前身韓退之手。捧秦鏡。僧無詞。至今人過孝祠側。不置之思。問誰錫君。不見周妻何肉。兩寂寂。千載英風。惟傳奕。

世傳地獄有酆都城之說。遂指四川酆都縣爲濫觴。憶同治乙丑。余歸自蜀。道出酆都。榜舟已晚。亟登岸。詢所謂森羅天子殿者。係在山顛。迤邐而上。天黑寺扁打門入。有僧延詣正殿。指殿中一井爲地獄門。戶懸紙錢。投之余。俯身下窺。覺不及尋丈。爲木板所隔。了無所見。遂目笑置之。按酆本從豐。改自明初。縣有陰王山。卽平都山。以陰長生王方平學道於此。得名爲道書七十二福地之一。後世小說因陰王字訛爲鬼山。此與郢書燕說何異。余有詩紀之曰。附會僧何誕。延緣地最偏。神山皆鬼窟。莫漫咏游仙。入峽險初度。擲身波浪間。前灘虎鬚怒。此是鬼門關。

曲園先生云羅酆山名鬼神所居酉陽雜俎云有羅酆山在  
北方癸地周迴三萬里高二千六百里則非在蜀也抱朴子  
對俗篇云勢可以總攝羅酆卽指此後世因一酆字遂訛指  
爲四川之酆都耳

陳圓圓於吳逆未死前卽遁跡爲尼滇城外瓦倉莊三勝庵是  
其皈依地尙存身前一盞一圖圖寫兩像一作少年靚粧一作  
比丘尼裝近經兵燹俱歸羽化矣有商山鸞影集詩二十二篇  
係圓圓乩筆嘉慶十九年中州李元滙所刻余嘗戲題七律四  
首云幼婦分明絕妙詞魂歸倩女夕陽遲飛來彩鳳應無力死  
後春蠶尙有絲香徑久埋西子屨秋墳慣唱鮑家詩一枝靈筆  
憑傳語疑是開奩索畫眉其玲瓏粧閣做南雲漂泊腰支瘦幾  
分薄命也如吳祭酒俠腸甯減李香君無端黃蘗謀全露疑到

紅閨計與閨辜負。妻如能直諫。曾將跋扈目將軍。

其二 看他跋扈終何

益寶殿飄零翠瓦 斑點詩中語也

分香何處哭曹瞞。早學參禪葉小鷩。一盃平

添香積飯。半牀靜對水晶盤。自圖玉貌留遺蛻。無意歌衫拾墜

歡。曾謁九蓮菩薩像。十年劫火憶長安。其商山可記采芝年。寒

食飛花少墓田。魂戀野園猶有癖。野園舊址在北門外。憐多才

鬼不能仙。玉鈎彷彿初三月。珠語纏綿廿二篇。輸與朝天孔家

女。代陳夫壻乞恩箋。孔有德女四貞適孫延齡延齡降三桂四貞勸其反正代延齡具疏乞降

同邑子方錢兄炳森初名銘恕。警石先生長君也。道光甲辰舉

人。與余爲庚戌教習同年兄。克守家學。性情溫厚。未嘗忤物。人

以詩文就質。必爲指示。其疵無周旋世故態。乃天不假年。績學

早世。未罄所藏。今秋其胞弟子密京卿自江甯以重刊尊甫詩

文全集寄示。其年譜後附有兄邠農偶吟稿。喜甚。亟展誦一過。

歎其詩學如此深醇惜曩時追逐譚藝時方攻舉業未暇縱論

及此也古體如曹水農甄

甄文七月廿五日曹水農作

云吁嗟乎名之顯晦

信有天託于文人之筆斯永傳水農名不紀簡編名亦傳兮由

此甄乃知各執一業果靜專何論士工商賈與力田惜哉上方

缺紀年歎識僅得日月全陶旅之工細且堅比似瀘于蜀師王

桑誰最賢

張叔未文有漢甄滄于氏作晉太康甄蜀師所作晉太安甄王桑作

古者食焉無忘事

欲識工良視其器吾聞曹氏世系昆吾同陶始夏伯見古志又

聞烏曹作甄工搏埴水農氏或王父字有如掌庾大夫官可世

坏城出土亦天使修街之甄同一例

嘉慶庚午禾郡修集街于土中得宋時修街甄宗

仁宗義宜聯金石契

泥水都科邵宗仁甄兮甄兮製硯堪簪書

他年携汝返故廬沈存周之錫斗張鳴岐之銅鑪朱碧山之銀

槎周北山之匏觚吾鄉清供羅列左右俱年年七月廿五爲汝

壽我願耕且讀兮長其汝以嬉娛實事求是有攷據有波瀾雅  
近竹垞翁

江都符南樵孝廉葆森輯國朝正雅集九十九卷以接歸愚  
尙書別裁集之後託始乾隆丙辰迄咸豐丙辰止體例仿明詩  
綜所輯詩多至二千餘家搜羅旣廣不無濫及且各家之詩未  
必盡見全集故棄取不能悉槩人心然以溯源流識正變備一  
百二十年之見聞實有資于藝林考鏡也

余少居螺螄浜鄰有沈秋濤茂才濤性情閒澹終歲課徒不踏  
省闈工畫花卉凡鱗羽蟲豸之屬描寫如生亦耽吟咏旋作旋  
棄閨中小詩云呼婢上簾鉤放進梅花影似宋人小令又咏放  
鳥船云黠哉老漁翁一艘載烏鬼奮翅闖銀濤昂頭禽錦鯉亦  
寫生妙手也

秀水鍾山樵茂才樑勇於爲文兼工詩賦天分旣高思力又敏  
蓋挾飛卿义手之才而學長吉嘔心之作曩在書院中肄業最  
爲瑞端節師所激賞年未四十以咯血亡咏老幕云也曾慷慨  
思投筆究竟生涯勝賣文直將老幕心事和盤托出又有九秋  
咏每首皆破空而起突兀可喜惜收束多不振茲各節錄其前  
半首如秋嘯云鬱不告人久一聲山谷昏狂才如阮籍夜月過  
蘇門秋感云此氣砭肌骨深於老病侵鬢毛漸欲改木石豈余  
心秋怨云山亦不能笑何論酒破顏舊恩撇團扇新恨寄刀鐙  
詩帶秋氣宜其憔悴以終也

同里徐平甫茂才蓉住白苕邨南余總角交也家世業賈君少  
孤而貧讀書甚慧里有點者陰挾相攸意詣塾中戲以駢且角  
三字試君作對益嘲其父白丁耳君時讀左傳應聲曰赤而毛

客含怒去從此不與交談君嘗述以爲笑然真絕對也與余同  
補弟子員銳於進取未見其止不幸中道而殁年僅三十一且  
無後家有青藤先生小像云係族之遠祖題者纍纍君亦賦五  
古一章甚奇恣亦可見其志焉王李爾何人優孟豈其偶譚詩  
聚簪纓布衣擯謝叟宗老古之狂去去勿回首滿腹不合宜陰  
符懸肘後跳身幕府中怒氣高北斗胡帥老兵耳狎坐共飲酒  
醉中吐奇謀殺倭似雞狗白鹿擬表文羣彥各抖擻一篇談笑  
成至尊霽顏受書生骨不肥法不縮印綬孤憤挾禍衷數奇復  
含垢併命骨肉間餘生付鉗杻夢夢者彼蒼誰能究休咎小子  
緬清芬意行無科臼萬一脫儒巾誓不門戶狃

當湖崔太翁雲程諱灝好善君子也有至行享大年五世同堂  
德門昌熾少時棄舉業服賈而善學寘大字腕力至老不衰子



吟珊丈以明經授例得廣文晨夕侍親不謁選工文善飲咸豐  
戊午太翁年七十吟珊丈徵詩侑祝同里沈浪仙筠贈以七律  
中一聯云前輩青蓮樓上客郎君玉樹酒中仙兩切姓崔工於  
繇事孫鑑湖與余爲姻婭舉同治癸酉孝廉曾元已入泮業儒  
光緒紀元乙亥太翁年八十有七無病而逝余獻挽聯云身歷  
六朝歡承五葉春秋直踰八旬布衣饒郭令精神得天獨厚子  
膺學博孫擢賢書曾元又列髦士阡表述歐陽家世爲善者昌  
蓋紀實也

後人咏史原可褒貶自如然亦施之貴得其當嘗見時賢詩集  
中有謁岳鄂王廟而題咏者大抵責備高宗嬉笑怒罵兼而有  
之夫旣入廟展謁則有如在之誠對臣子而訕其君父此豈鄂  
王所忍聞抑失詩人忠厚之旨矣余昔道經湯陰見驛壁有無

名子題云韓王痛哭張王笑一樣中興大將才此卻雋快

邯鄲道上過客莫不留題傳舍中疥壁惡詩不堪寓目然亦有佳者如人生但得黃梁飽不作邯鄲道上游此意未經人道惜忘其姓氏讀之令人俯仰自失

李小湖廷尉好雲樓集有咏史小樂府六言二十首蓋感咸豐末時事而作茲節錄四首敵未攻時稱守敵來都辦一走蒼琅自啟北門獎惑已入南斗終須劉氏安劉尙有周公輔周但恨無臺避債何時署富民侯百姓牂羊墳首三軍膽蛇入口刮龜背無毛探刺虎牙傷手夢裏觚棱金爵悲來荆棘銅駝惟祝麒麟罷闢莫教鸚鵡興歌又咏四皓云老預人家國商山空長芝祖龍坑漏此人璣怨鍾誰世幸絳侯在公眞優孟疑安劉無片策但見偉容儀優孟句奇創正代四皓斡旋

畫家口占自題時有清新之什所謂詩不關學是也曾見有題  
繡球花云梅花落盡無消息卻被東風滾作團又費曉樓自題  
仕女圖云朝來無賴鵲啼舍北邨南霧欲迷新種陌頭桑樹  
小比來剛與阿儂齊又有以便面索書者一面畫櫻筍等物題  
曰青筍朱櫻入饌新厨開莫惜酒千巡人生佳節休輕過明日  
看花不是春欸署曉蘭三詩都有風趣

男

豫恩

全校